

歷代名家尺牘

六朝尺牘

(附北魏北齊北周)

上海文書局印行



上海图书馆藏书



A541 212 0010 7482B

歷代名家尺牘例言

書啓牋簡名目不一綜覈義實各有隸屬茲從周氏尺牘新鈔吳氏昭代尺牘例以定厥名較爲普通

本編之選注重文學專集總集刊本抄本博覽約取甄錄綦嚴

自周迄清年歷綿遠由質趨文由簡趨繁風會使然各有佳妙不得歧視每編簡首附以小傳論世知人不無裨益

言理言情言事論古論政論文短長兼錄駢散並收一編之中無體不備評論陋習未敢因依祇加圈點利便誦讀見仁見知會心不遠是在善學刊本相沿魯魚亥豕不無訛奪一字之類一句之疵灼知其誤或勇改之或逕刪之要以無碍上下語氣爲斷

卷頁多少各編不同或合數代爲一編或分一代爲上下卷短祚之朝采錄不多

歷代名家尺牘 例言


以次附後要於應有盡有

歷代名家尺牘

六朝尺牘序

金陵爲虎踞龍蟠之地，仲謀建都，人物蔚興，東晉繼之，過江名士數多於鯽，清談媿媿，玄旨超超，興來情往往，往往於小小，簡札中寓之齊梁，而後專事綺靡，搖筆散珠，動墨橫錦，上行下效，公移私牘，亦復玲瓏，其音鞏繡，其飾馴至北魏齊周，駸駸同化，徐庾一派綿延而未絕於唐，茲編所選，駢多散少，學者苟有志於儷體文字，則此其初栳之導焉。

民國十六年五月吳興王文濡識



六朝尺牘序

六朝尺牘目錄

別咨諸葛瑾 報陸遜 以上吳大帝 遺羣臣書 吳主皓 與諸葛恪書 吳薛綜

遺賀循書 晉元帝 遺王含書 晉王導 與石聰書 晉孔坦 與王導書 晉陳

頴 與吏部郎謝萬書 報殷浩書 誠謝萬書 與人書 以上晉王羲之 與

范甯書 晉徐邈 報宋公書 晉韓延之 與支遁書 晉謝安 與桓祕書 晉習鑿

齒 致謝玄書 晉殷仲堪 與左軍褚裒解交書 晉袁喬 遺楊軌書 晉呂光

與張新安論孔釋書 晉譙王尚之 遺應詹書 晉杜弢 與苻堅書 晉慕容泓

與臧燾書 宋武帝 獄中上書 宋孔熙先 答魏主拓跋燾書 宋臧質 與江夏

王義恭牋 宋謝莊 登大雷岸與妹書 宋鮑照 報南郡王義宣書 宋王玄謨

遺蕭道成書 宋沈攸之 辭署記室又牋 宋孔凱 報沈攸之書 齊高帝 與何

點書勸令菜食 齊周顒 答魏主托跋宏書 齊曹虎 遺崔祖思書 再答釋僧

巖以上齊劉善明 謝竟陵王示扇啟 齊王融 與豫章王賤請宥朱謙之 齊張

融 答陸澄書 齊王儉 答朝士訪仙佛兩法體相書 答虞中書書 答謝中

書書以上梁陶弘景 答湘東王書 梁謝幾卿 與交友論隱書 報袁叔明書

到主簿日賤詣右軍建平王以上梁江淹 與徐勉書 答沈麟士書 與陶

弘景書以上梁沈約 弔樂永世書 上蕭太傅固辭奪禮啟以上梁任昉 與

朱元思書 與顧章書以上梁吳均 報伏挺書 梁徐勉 爲衡山侯與婦書

梁何遜 謝賚錢治宅啟 梁任孝恭 奉辭南康王府賤 答江琰書以上梁王

僧孺 答湘東王書 梁劉孝綽 北使還與永豐侯書 謝晋安王賜宜城酒啟

以上梁劉孝儀 與陳伯之書 梁丘遲 追答劉秣陵沼書 梁劉峻 謝歷日啟

梁庾肩吾 與尙書令王儉書 梁張充 東宮上掘得慈覺寺鐘啟 與廣信侯

書 答新渝侯和詩書 答蕭子雲上飛白書 屏風書 答張纘謝示集書 答

徐摛書 與劉孝綽書 謝賚扇啟以上梁簡文帝 與蕭挹書 與劉智藏書

與劉孝綽書 以上梁元帝 謝東宮賚園啟 謝皇太子賚果然褥啟 以上梁
張纘 答貞陽侯書 梁裴之橫 答王褒書 陳周弘讓 使東魏值侯景亂與北
齊尚書令求還書 答周處士弘讓書 與王吳郡僧智書 與李邢書 答族
人梁東海太守長孺書 以上陳徐陵 爲王寬與婦義安主書 陳伏知道 答劉
景安書 北魏崔亮 與梁太尉王僧辯書 北齊文宣帝 與徐僕射書 北齊尹義
尚 與陽休之書 北齊祖鴻勳 酬濟北戴先生遠書 北周釋慧命 爲梁上黃
侯世子與婦書 答趙王啟 謝趙王示新詩啟 謝趙王賚米啟 以上北周庾
信

六朝尺牘目錄



六朝尺牘作者小傳

吳大帝姓孫氏名權字仲謀承兄策後據有江東成鼎峙之業曹丕稱帝策爲吳王後正尊號都建業國號吳凡十四年而崩諡曰大皇帝

吳主皓權孫字亢宗既立纍暴驕盈多忌諱好酒色降晉封歸命侯

薛綜吳竹邑人字敬文樞機敏捷善於詞令孫權召爲五官郎中除合浦交趾太守赤烏中官至太子少傅卒所著詩賦雜論凡數萬言又注張衡二京賦

晉元帝名睿字景文初爲安東將軍及愍帝遇害乃卽帝位於建康偏安江左史稱東晉

王導晉臨沂人字茂弘元帝爲琅琊王時導知天下將亂勸王收賢俊與共事及卽位以爲丞相後輔明帝成帝歷事三朝官至太傅卒諡文獻

孔坦晉山陰人字君平通春秋傳解屬文佐王導平蘇峻累遷侍中後以忤導出

爲廷尉怏怏以疾去職

陳顓晉苦縣人字延思好學有文義太守劉享拔爲主簿州辟部從事齊王冏起義州遣顓將兵赴之拜駙馬都尉元帝時典法兵二曹陶侃表爲梁州刺史綏懷荒弊甚有威惠召還卒

王羲之晉會稽人字逸少仕爲右軍將軍會稽內史以書名

徐邈晉姑幕人孝武招延儒學謝安舉以應選由中書舍人累官驍騎將軍晚遭父喪先遭疾患因毀遂卒

韓延之晉赭陽人字顯宗劉裕伐司馬休之密書招之不往與休之俱奔姚興後入魏爲虎牢鎮將封魯陽侯

謝安晉陽夏人字安石少有重名徵辟皆不就人爲語曰安石不出如蒼生何年四十餘始出爲桓溫司馬累官太保卒贈太傅故世稱謝太傅

習鑿齒晉襄陽人字彥威博學洽聞以文章著稱桓溫辟爲從事甚器重之累遷

別駕溫覬非望著晉漢春秋以裁正之今書已佚

殷仲堪晉陳郡人性至孝父病衣不解帶執藥揮淚遂眇一目孝武授都督荆益寧三州軍事鎮江陵安帝時與桓玄戰兵敗爲玄追兵所獲逼令自殺

袁喬字彥叔博學有文才桓溫引爲司馬拜江夏相以破敵功進號龍驤將軍封湘西伯

呂光晉略陽氐人字世明爲後涼始祖初事苻堅堅死自稱涼州牧後稱三河王又稱天王在位十三年卒諡懿武皇帝

譙王尙之字伯道爲祕書郎遷散騎侍郎出爲振威將軍廣陵相尋嗣封譙王爲驃騎諮議參軍以討王恭功拜建威將軍豫州刺史假節尋進號前將軍討桓玄兵敗被擒死之

杜弼晉成都人字景文爲醴陵令時巴蜀流人聚衆擾荆湘推弼爲主自稱梁益二州牧湘州刺史縱兵侵暴前後數十載將士多物故乃請降後復叛爲陶侃

所敗不知所終

慕容泓封濟北王燕亡入秦爲北地長史苻堅敗起兵自稱使持節大都督陝西諸軍事大將軍雍州牧濟北王領司徒以晉太元九年改元燕興明年爲其下所殺

宋武帝姓劉氏名裕字德輿晉安帝時爲下邳太守桓玄稱帝起兵討玄大破之安帝復位又滅南燕後秦累封宋公元熙初受禪於建康國號宋

孔熙先宋魯人博學有縱橫才文史星算無不兼善爲員外散騎侍郎久不得調以彭城王義康有恩於其父及義康被黜熙先密懷報效欲要朝廷大臣以計交范曄謀清君側事敗被誅

臧質宋莒人字含文文帝時爲徐兗二州刺史元嘉末守盱眙禦魏兵有功遷雍州刺史討擒元凶劭封始興郡公爲江州刺史後舉兵反兵敗被誅

謝莊宋陽夏人字希逸年七歲能屬文文帝見而異之歎曰藍田生玉豈虛也哉

歷官吏部尙書吳郡太守金紫光祿大夫年三十六而卒

鮑照宋東海人字明遠工詩文辭臨海王子頊爲荊州照爲前軍參軍子頊敗爲亂軍所殺有鮑參軍集

王玄謨宋祁人字彥德文帝時官汝陰太守每陳北侵之策及大舉北征玄謨兵大敗官終豫州刺史卒諡莊

沈攸之宋武康人字仲達晚年好學嘗歎曰早知窮達有命恨不十年讀書蕭道成專政攸之舉兵討之敗死

孔覲宋山陰人字思遠孝武時爲散騎常侍性嗜酒常醉而明曉政事及醒判決未嘗有壅明帝時發兵反事敗被誅

齊高帝姓蕭氏名道成字紹伯仕宋封齊王廢順帝自立國號齊都建康帝沈深有大量博涉經史善屬文兼工草隸在位四年崩

周顒齊安成人初爲宋益州主簿高帝時爲始興王前軍諮議直侍殿省終國子

博士顓音辭辨麗工隸書兼善老易長於佛理著三宗論四聲切韻

曹虎齊下邳人字士威仕宋爲前軍將軍入齊以功爵爲侯東昏卽位遷前將軍鎮軍司馬始安王遙光反虎領軍屯青溪中橋事寧轉散騎常侍右衛將軍帝疑虎舊將兼利其財新除未及拜見殺

劉善明齊平原人宋元嘉末青州饑善明開倉救鄉里人咸德之沈攸之反善明獻計討平之高帝卽位封新塗伯

王融齊瑯琊人字元長舉秀才累官中書郎武帝幸芳林園禊宴朝臣融爲曲水詩序文藻富麗稱於當世後坐事下獄死

張融齊吳人字思光有早譽廣越嶂嶮獠賊執融將殺食之融神色不動方作洛生詠賊異釋之浮海至交州於海中作海賦文辭詭激累官太子中庶子司徒左長史

王儉齊臨沂人字仲寶宋明帝時歷官祕書丞依七略撰七志四十卷表獻之辭

甚典又撰元徽四部書目常謂人曰江左風流宰相唯有謝安蓋自比也

陶弘景梁秣陵人字通明齊高帝時爲諸王侍讀後隱於句容句曲山自號華陽隱居晚號華陽真逸又曰華陽真人好神仙善辟穀導引之術年八十五無病而卒

謝幾卿梁陽夏人有神童譽年十二召補國子生及長博學有文采長於立理仕齊爲晉安王主簿入梁歷尙書左丞太子率更令

江淹梁考城人字文通早有文譽梁天監中官金紫光祿大夫晚年才思微退詩文無佳句時人謂之才盡著有前後集及齊史十志

沈約梁武康人字休文篤志好學博通羣籍工詩文仕宋及齊累官司徒左長史武帝受禪爲尙書僕射遷尙書令卒謚隱所著有宋書等

任昉梁博昌人字彥昇八歲能屬文仕齊爲太常博士武帝時爲義興新安太守爲政清省吏民便之所著文章有名於世

吳均梁吳興故鄣人字叔庠好學有俊才武帝時柳惲爲吳興刺史辟爲郡主簿日與賦詩士多效之號吳均體

徐勉梁郟人字修仁孤貧好學早勵清節仕梁爲吏部尙書嘗與客夜坐有求官者勉正色曰今夕只可談風月不宜及公事累官至中書令卒諡簡肅

何遜梁郟人字仲言八歲能賦詩文章與劉孝綽並稱世謂之何劉天監中官尙書水部郎終廬陵王記室有何水部集

任孝恭梁臨淮人字孝恭幼孤事母以孝聞精力勤學與武帝有舊召入西省撰史太清中侯景寇逼爲賊所害

王僧孺梁郟人字僧孺六歲能屬文旣長好學家貧常傭書以養母仕齊歷唐令天監中爲南海太守再遷御史中丞普通六年卒

劉孝綽梁彭城人字孝綽七歲能爲文嘗侍武帝宴賦詩七篇帝歎賞授祕書丞晚年爲祕書監孝綽著述甚富有文集數十萬言

丘遲梁烏程人字希範武帝時爲中書郎待詔文德殿帝嘗著連珠羣臣繼作者數十人遲文最佳官至司空從事中郎尋出爲永嘉太守

劉峻梁平原人字孝標好學安貧耕讀不輟聞人有異書必往借之時人謂之書淫武帝召問不稱旨乃著辨命論以寄其懷遊東陽紫巖山築室居焉卒諡立靜先生

庾肩吾梁新野人字子慎八歲能賦詩初爲晉安王國常侍隨在雍州被命與徐摛劉孝威等抄撰衆籍號高齋學士累官至太子率更令中庶子出守襄陽致仕歸

張充梁吳郡人字延符少時不持操行年三十始修身改節尤明老易能清言累官散騎常侍金紫光祿大夫

簡文帝姓蕭氏名綱字世纘高祖第三子讀書十行俱下博綜羣書善言立理侯景廢帝爲晉安王幽於永福省尋遣王偉等弑之在位凡三年

梁元帝名繹字世誠高祖第七子初封湘東王討侯景殺豫章王卽位於江陵蕭
警引西魏圍江陵城陷被執死之在位凡三年

張纘梁方城人字伯緒眉目疎朗神彩煥發累官平北將軍寧蠻校尉後爲岳陽
王警所害

裴之橫梁聞喜人字如岳簡文帝以爲河東王常侍元帝時位廷尉卿隨王僧辯
破侯景又破武陵王除吳興太守後爲徐州刺史魏軍至戰死

周弘讓陳安城人性簡素博學多通始仕不得志隱於句容之茅山承聖初爲國
子祭酒尋加仁威將軍陳天嘉初以白衣領太常卿光祿大夫

徐陵陳郟人字孝穆仕梁爲通直散騎常侍陳受禪加散騎常侍時安成王瑱輔
政專橫陵奏劾之朝廷肅然官至太子少傅卒諡曰章有徐孝穆集

伏知道陳安丘人爲梁伏挺之從子

崔亮北魏東武城人字敬儒爲度支尙書自遷都之後經略四方又營洛邑費用

甚廣亮在度支別立條格歲省億計又議修汴蔡二渠以通邊運公私賴焉

北齊文宣帝姓高氏名洋字子進神武第二子初封太原郡公後封齊王受禪改

元天保在位十年

尹義尙不詳

祖鴻勳北齊范陽人弱冠爲州主簿臨淮王彧表薦鴻勳有文學除奉朝請竟不

往謝神武嘗徵至并州作晉祠記好事者爭傳其文位至高陽太守天保初卒

於官

釋慧命北周晉陽人住河陽仙城山善光寺

庾信北周新野人字子山俊邁絕倫博覽羣書文章與徐陵齊名世號徐庾體梁

元帝時以右衛將軍使西魏被留不遣周明帝武帝並好文學皆恩禮之累遷

驃騎大將軍開府儀同三司世稱庾開府有庾開府集

六朝尺牘小傳

六朝尺牘

別咨諸葛瑾

吳大帝

近得伯言表。以爲曹丕已死。毒亂之民。當望旌瓦解。而更靜然。聞皆選用忠良。寬刑罰。布恩惠。薄賦省役。以悅民心。其患更深於操時。孤以爲不然。操之所行。其惟殺伐。小爲過差。及離間人骨肉。以爲酷耳。至於御將。自古少有。比之於操。萬不及也。今叡之不如丕。猶丕不如操也。其所以務崇小惠。必以其父新死。自度衰微。恐困苦之民。一朝崩沮。故彊屈曲。以求民心。欲以自安住耳。寧是興隆之漸。邪。聞任陳長文。曹子丹輩。或文人諸生。或宗室戚臣。寧能御雄才虎將。以制天下乎。夫威柄不專。則其事乖錯。如昔張耳。陳餘。非不敦睦。至於秉勢自還。相賊乃事。理使然也。又長文之徒。昔所以能守善者。以操笮其頭。畏操威嚴。故竭心盡意。不敢爲非耳。逮丕繼業。年已長大。承操之後。以恩情加之。用能感義。今叡幼弱。隨人東西。此

曹等輩必當因此弄巧行態。阿黨比周。各助所附。如此之日。奸讒並起。更相陷懟。轉成嫌貳。自爾已往。羣下爭利。主幼不御。其爲敗也。焉得久乎。所以知其然者。自古至今。安有四五人把持刑柄。而不離刺轉相蹄齧者也。彊當陵弱。弱當求援。此亂亡之道也。子瑜卿但側耳聽之。伯言常長於計校。恐此一事小短也。

報陸遜

吳大帝

夫法令之設。欲以遏惡防邪。儆戒未然也。焉得不有刑罰。以威小人乎。此爲先令。後誅。不欲使有犯者耳。君以爲太重者。孤亦何利其然。但不得已而爲之耳。今承來意。當重諮謀。務從其可。且近臣有盡規之諫。親戚有補察之箴。所以匡君正主。明忠信也。書載予違汝弼。汝無面從。孤豈不樂忠言。以自裨補邪。而云不敢。極陳何得爲忠讜哉。若小臣之中。有可納用者。寧得以人廢言。而不採擇乎。假但諂媚取容。雖闇亦所明識也。至於發調者。徒以天下未定。事以衆濟。若徒守江東。修崇寬政。兵自足用。復用多爲。顧坐自守。可陋耳。若不豫調。恐臨時未可使用也。又孤

與君分義特異。榮戚實同。來表云。不敢隨衆。容身苟免。此實甘心所望於君也。

遺羣臣書

吳主皓

孤以不德。忝繼先軌。處位歷年。政教凶勃。遂令百姓久困塗炭。至一朝歸命有道。社稷傾覆。宗廟無主。慙愧山積。沒有餘罪。自惟空薄。過偷尊號。才瑣質穢。任重王公。故周易有折鼎之誠。詩人有彼其之譏。自居宮室。仍抱篤疾。計有不足。思慮失中。多所荒替。邊側小人。因生酷虐。虐毒橫流。忠順被害。闇昧不覺。尋其壅蔽。孤負諸君事已難圖。覆水不可收也。今大晉平治四海。勞心務于擢賢。誠是英俊展節之秋也。管仲極讎。桓公用之。良平去楚。入爲漢臣。舍亂就理。非不忠也。莫以移朝改朔。用損厥志。嘉勗休尚。愛敬動靜。夫復何言。投筆而已。

與諸葛恪書

吳薛綜

山越恃阻。不賓歷世。緩則首鼠。急則狼顧。皇帝赫然。命將西征。神策內授。武師外震。兵不染鏑。甲不沾汗。元惡旣梟。種黨歸義。蕩滌山藪。獻戎十萬。野無遺寇。邑閭

殘奸既埽兇慝。又充軍用。藜藜稂莠。化爲善草。魑魅魍魎。更成虎士。雖實國家。威靈之所加。亦信元帥。臨履之所致也。雖詩美執訊。易嘉折首。周之方召。漢之衛霍。豈足以談功軼古人。勳超前世。主上歡然。遙用歎息。感四牡之遺典。思飲至之舊章。故遣中臺近官。迎致犒賜。以旌茂功。以慰劬勞。

遺賀循書

晉元帝

夫百行不同。故出處道殊。因性而用。各任其真耳。當宇宙清泰。彛倫攸弼。隨運所遇。動默在己。或有遐棲高蹈。輕舉絕俗。逍遙養和。恬神自足。斯蓋道隆人逸。勢使其然。若乃時運屯弊。主危國急。義士救時。馳驅拯世。燭之武乘。緹以入秦。園綺彈冠。而臣漢。豈非大雅君子。卷舒合道乎。虛薄寡德。忝備近親。謬荷寵位。受任方鎮。殫服立風。景羨高矩。常願棄結駟之軒軌。策紫篁而造門。徒有其懷。而無從賢之實者。何良以寇逆殷擾。諸夏分崩。皇居失御。黎元荼毒。是以日夜憂懼。慷慨發志。在竭節耳。前者顧公臨朝。深賴高算。元凱既登。巢許獲逸。至於今日。所謂道之云。

亡。邦。國。殄。悴。羣。望。顛。顛。實。在。君。侯。苟。義。之。所。在。豈。得。讓。勞。居。逸。想。達。者。亦。一。以。貫。之。也。庶。稟。徽。猷。以。弘。遠。規。今。上。尙。書。屈。德。爲。軍。司。謹。遣。參。軍。沈。禎。銜。命。奉。授。望。必。屈。臨。以。副。傾。遲。

遺王含書

晉王導

近承大將軍困篤絲繇。或云已有不諱。悲怛之情。不能自勝。尋知錢鳳大嚴。欲肆奸逆。朝士忿憤。莫不扼腕。去月二十三日。得征北告。劉遐陶瞻蘇峻等。深懷憂慮。不謀同辭。都邑大小。及二宮宿衛。咸懼有往年之掠。不復保其妻孥。是以聖主發赫斯之命。具如檄旨。近有嘉詔。崇兄八命。望兄獎羣賢忠義之心。抑奸細不逞之計。當還武昌。盡力藩任。卒奉來告。乃承與犬羊俱下。雖當逼迫。猶以罔然。兄立身率素。見信明於門宗。年踰耳順。位極人臣。仲玉安期。亦不足作佳少年。本來門戶良可惜也。兄之此舉。謂可得如大將軍昔年之事乎。昔年佞臣亂朝。人懷不寧。如導之徒。心思外濟。今則不然。大將軍來屯于湖。漸失人心。君子危怖。百姓勞弊。將

終之日。委重安期。安期斷乳。來幾日。又於時望。便可襲宰相之迹。邪。自開闢以來。頗有宰相孺子者。不諸有耳者。皆是將禪代意。非人臣之事也。先帝中興。遺愛在人。聖主聰明。德洽朝野。思與賢哲。弘濟艱難。不北面而執臣節。乃私相樹建。肆行威福。凡在人臣。誰不憤歎。此直錢鳳不良之心。聞於遠近。自知無地。遂唱姦逆。至如鄧伯山。周道知。恒有豪情。往來人士。咸皆明之。方欲委任。與共戮力。非徒無慮而已也。導門戶。小大受國厚恩。兄弟顯寵。可謂隆矣。導雖不武。情在寧國。今日之事。明目張膽。爲六軍之首。寧忠臣而死。不無賴而生矣。但恨大將軍桓文之勳。不遂。而兄一旦爲逆節之臣。負先人平素之志。旣沒之日。何顏見諸父於黃泉。謁先帝於地下。邪。執省來告。爲兄羞之。且悲且慚。願速建大計。惟取錢鳳一人。使天下獲安。家國有福。故是竹素之事。非惟免禍而已。夫福如反手。用之卽是。導所統六軍。石頭萬五千人。宮內後苑二萬人。護軍屯金城六千人。劉遐已至。征北昨已濟江。萬五千人。以天子之威。文武舉力。豈可當乎。事猶可追。兄早思之。大兵一奮。導

以爲灼爛也。

與石聰書

晉孔坦

華狄道乖。南北迴邈。瞻河企宋。每懷飢渴。數會陽九。天禍晉國。姦凶猾夏。乘釁肆虐。我德雖衰。天命未改。乾符啓再集之慶。中興應靈期之會。百六之艱。旣過。惟新之美。日隆。而神州振蕩。遺氓波散。誓命戎狄之手。跼躄豺狼之穴。朝廷每臨寐永。歎痛心疾。首天罰旣集。罪人斯隕。王旅未加。自相魚肉。豈非人怨神怒。天降其災。蘭艾同焚。賢愚所歎。矜哀勿喜。我后之仁。大赦曠廓。惟虎是討。彭譙使至。粗具動靜。知將軍忿疾醜類。翻然同舉。承問欣豫。慶若在己。何知幾之先覺。介石之易悟哉。引領來儀。怪無聲息。將軍出自名族。誕育洪胄。遭世多故。國傾家覆。生離親屬。假養異類。雖逼僞寵。將亦何賴。聞之者猶或有悼。况身嬰之。能不憤慨哉。非我族類。其心必異。誠反族歸正之秋。圖義建功之日也。若將軍喻納往言。宣之同盟。率關右之衆。輔河南之卒。申威趙魏。爲國前驅。雖竇融之保河。西黥布之去項。羽比

諸○古○人○未○足○爲○喻○聖○上○寬○明○宰○輔○弘○納○雖○射○鈎○之○隙○賞○之○故○行○雍○齒○之○恨○侯○之○列○國○况○二○三○子○無○曩○人○之○嫌○而○遇○天○啟○之○會○當○如○影○響○有○何○遲○疑○今○六○軍○戒○嚴○水○陸○齊○舉○熊○羆○踴○躍○齧○噬○爭○先○鋒○鏑○一○交○玉○石○同○碎○雖○復○後○悔○嗟○何○及○矣○僕○以○不○才○世○荷○國○寵○雖○實○不○敏○誠○爲○行○李○之○主○區○區○之○情○還○信○所○具○夫○機○事○不○先○鮮○不○後○悔○自○求○多○福○惟○將○軍○圖○之○

與王導書

晉陳顥

中○華○所○以○傾○弊○四○海○所○以○土○崩○者○正○以○取○才○失○所○先○白○望○而○後○實○事○浮○競○驅○馳○互○相○薦○薦○言○重○者○先○顯○言○輕○者○後○敘○遂○相○波○扇○乃○至○淩○遲○加○有○莊○老○之○俗○傾○惑○朝○廷○養○望○者○爲○弘○雅○政○事○者○爲○俗○人○王○職○不○恤○法○物○墜○喪○夫○欲○制○遠○先○由○近○始○故○出○其○言○善○千○里○應○之○今○宜○改○張○明○賞○信○罰○拔○卓○茂○於○密○縣○顯○朱○邑○於○桐○鄉○然○後○大○業○可○舉○中○興○可○冀○耳○

與吏部郎謝萬書

晉王羲之

古之辭世者。或被髮佯狂。或汚身穢跡。可謂艱矣。今僕坐而獲免。遂其宿心。其爲慶幸。豈非天賜。違天不祥。頃東游還。修植桑果。今盛敷榮。率諸子抱弱孫游觀。其間有一味之甘。割而分之以娛目前。雖植德無殊。邈猶欲教養子孫。以敦厚退讓。戒以輕薄。庶令舉策數馬。彷彿萬石之風。君謂此何如。比當與安石東游山海。并行田視地利。頤養閑曠。衣食之餘。欲與親知時共歡讌。雖不能興言高詠。銜杯引滿。語田里所行。故以爲撫掌之資。其爲得意。可勝言耶。常依陸賈班嗣。楊王孫之處世。甚欲希風數子。老夫志願盡於此也。

報殷浩書

晉 王羲之

吾素志無廊廟。直王丞相時。果欲內吾。誓不許之。手跡猶存。由來尙矣。不於足下參政。而方進退。自兒娶女嫁。便懷向子平之志。數與親知言之。非一日也。若蒙驅使。關隴巴蜀。皆所不辭。吾雖無專對之能。直謹守時命。宣國家威德。故當不同於凡使。必令遠近咸知。朝廷留心於無外。此所益殊不同。居護軍也。漢末使太傅馬

日禫慰撫關東。若不以吾輕微。無所爲疑。宜及初冬以行。吾惟恭以待命。

誠謝萬書

晉王羲之

以君邁往不屑之韻。而俯同羣辟。誠難爲意也。然所謂通識正自當隨事行藏。乃爲遠耳。願君每與士卒之下者同甘苦。則盡善矣。食不二味。居不重席。此復何有。而古人以爲美談。濟否所由。實在積小。以致高大。君其存之。

與人書

晉王羲之

吾書比之鍾張。當抗行。或謂過之。張草猶當雁行。張精熟過人。臨池學書。池水盡墨。若吾耽之若此。未必謝之。後達解者。知其評之不虛。吾盡心精作亦久。尋諸舊書。惟鍾張故爲絕倫。其餘爲是小佳。不足在意。去此二賢。僕書次之。須得書意。轉深。點畫之間。皆有意。自有言所不盡。得其妙者。事事皆然。平南李式論君不謝。

與范甯書

晉徐邈

知足下遣十五議曹各之一縣。又吏假歸。白所聞見。誠是足下留意百姓。故廣其

視聽。吾謂勸導以實不以文。十五議曹。欲何所敷宣耶。庶事辭訟。足下聽斷充塞。則物理足矣。上有理務之心。則下之求理者至矣。日昃省覽。庶事無滯。則吏愼其負。而人聽不惑。豈須邑至里詣。飾其游聲哉。非徒不足致益。乃是蠶漁之所資。又不可縱小吏爲耳目也。豈有善人君子。而干非其事。多所告白者乎。君子之心。誰毀誰譽。如有所譽。必由歷試。如有所毀。必以著明。託社之鼠。攻之甚害。自古以來。欲爲左右耳目者。無非小人。皆先因小忠而成。其大不忠。先藉小信而成。其大不信。遂使君子道消。善人輿尸。前史所書。可爲深鑒。足下選綱紀。必得國士。足以攝諸曹。諸曹皆是良吏。則足以掌文案。又擇公方之人。以爲監司。則清濁能否。與事而明。足下但平心居宗。何取於耳目哉。昔明德馬后。未嘗顧與左右言。可謂遠識。况大丈夫而不能免此乎。

報宋公書

晉 韓延之

承親率戎馬。遠履西畿。闔境士庶。莫不惶駭。何者。莫知師出之名。故也。今辱來疏。

始知以譙王前事。良增歎息。司馬平西體國忠貞。款愛待物。當於古人中求耳。以君公有匡復之勳。家國蒙賴。推德委誠。每事詢仰。譙王往以微事見劾。猶自表遜位。況以大過而當默然邪。但康之前言。有所不盡。故重使胡道。諮白所懷。道未及返。已奏表廢之。所不盡者命耳。推寄相與之懷。正當如此。有何不可。便興兵戈。自義旗秉權以來。四方方伯。誰敢不先相諮。疇而逕表天子。可謂欲加之。罪其無辭乎。劉裕足下。海內之人。誰不見足下此心。而復欲欺誑國士。天地所不容。在彼不在此矣。來示言處懷期物。自有由來。今伐人之君。啗人以利。真可謂處懷期物。自有由來者矣。劉藩死於閭闔之內。諸葛斃於左右之手。甘言詫方伯。襲之以輕兵。遂使席上靡款懷之士。閭外無自信諸侯。以是爲得算。良可恥也。貴府將佐及朝廷賢德。寄性命以過日。心企太平久矣。吾誠鄙劣。嘗聞道於君子。以平西之至德。寧可無授命之臣乎。未能自投虎口。比迹郗任之徒。明矣。假令天長喪亂。九流混濁。當與臧洪游於地下。不復多言。

與支遁書

晉謝安

思君日積。計辰傾遲。知欲還剡。自治甚以悵然。人生如寄耳。頃風流得意之事。殆爲都盡。終日感感。觸事惆悵。唯遲君來。以晤言消之一日。當千載耳。此多山壑。閑靜。差可養疾。事不異剡。而鑿藥不同。必思此緣。副其積想也。

與桓祕書

晉習鑿齒

吾以去五月三日。來達襄陽。觸目悲感。畧無歡情。痛惻之事。故非書言之所能具也。每定省家舅。從北門入。西望隆中。想臥龍之吟。東眺白沙。思鳳雛之聲。北臨樊墟。存鄧老之高。南眷城邑。懷羊公之風。縱目檀溪。念崔徐之友。肆睇魚梁。追二德之遠。未嘗不徘徊。移日惆悵。極多撫乘。躊躇慨然而泣。曰。若乃魏武之所置酒。孫堅之所隕斃。裴杜之故居。繁王之舊宅。遺事猶存。星列滿目。瑣瑣常流。碌碌凡士。焉足以感其方寸哉。夫芬芳起於椒蘭。清響生乎琳琅。命世而作佐者。必垂可大之餘風。高尚而邁德者。必有明勝之遺事。若向八君子者。千載猶使義想其爲人。

况相去之不遠乎。彼一時也。此一時也。焉知今日之才不如疇辰。百年之後。吾與足下不並爲景升乎。

致謝玄書

晉殷仲堪

胡亡之後。中原子女。鬻於江東者。不可勝數。骨肉星離。荼毒終年。怨苦之氣。感傷和理。誠喪亂之常。足以懲戒。復非王澤廣潤。愛育蒼生之意也。當世大人。既慨然經略。將以救其塗炭。而使理至於此。良可歎息。願節下弘之以道德。運之以神明。隱心以及物。垂理以禁暴。使足踐晉境者。必無懷感之心。枯槁之類。莫不同漸天潤。仁義與干戈竝運。德心與功業俱隆。實所期於明德也。頃聞抄掠所得。多皆探樵飢人。壯者欲以救子。少者志在存親。行者傾筐以顧。念居者吁嗟以待。延而一旦。幽繫生離。死絕求之於情。可傷之甚。昔孟孫獵而得麋。使秦西以歸之。其母隨而悲鳴。不忍而放之。孟孫赦其罪。以傳其子。禽獸猶不可離。況於人乎。夫飛鵝惡鳥也。食桑葚猶懷好音。雖曰戎狄。其無情乎。苟感之有物。非難化也。必使邊界無

貪小利。強弱不得相陵。德音一發。必聲振沙漠。二寇之黨。將靡然向風。何憂黃河之不濟。函谷之不閉哉。

與左軍褚裒解交書

晉 袁 喬

皇太后踐登正祚。臨御皇朝。將軍之於國。外姓之太上皇也。至於皇子近屬。咸有揖讓之禮。而況策名人臣。而交媾人父。天性攸尊。亦宜體國而重矣。故友之好。請於此辭。染絲之變。墨翟致懷岐路之感。楊朱興歎。况與將軍遊處。少長雖世。譽先。後而臭味同歸也。平昔之交。與禮數而降。箕踞之懽。隨時事而替。雖欲虛詠濠肆。脫落儀制。其能得乎。來物無停。變化遷代。豈惟寸晷。事亦有之。夫御器者。神制衆。以約。願將軍怡情無事。以理勝爲任。親仗賢達。以納善爲大。執筆惆悵。不能自盡。

遺楊軌書

晉 呂 光

自羌胡不靖。郭騰叛逆。南藩安否。音問兩絕。行人風傳。云卿擁逼百姓。爲麀唇齒。卿雅志忠貞。有史魚之操。鑒察成敗。遠侔古人。豈宜聽納姦邪。以虧大美。陵霜不。

彫者松柏也。臨難不移者君子也。何圖松柏彫於微霜而雞鳴已於風雨。郭麐巫卜小數。時或誤中。攷之大理。率多虛謬。朕宰化寡方。澤不逮遠。致世事紛紜。百城離叛。戮力一心。同濟巨海。者望之於卿也。今中倉積粟數百千萬。東人戰士一當百餘。入則言笑晏晏。出則武步涼州。吞麀咀業。綽有餘暇。但與卿形雖君。臣心過父子。朕欲全卿名節。不使貽笑將來。

與張新安論孔釋書

晉 譙 王 尚 之

佛教以罪福因果。有若影響。聖言明審。令人寒心。然自上古帝皇。文武孔周。典謨訓誥。靡不周備。未有述三世顯報。報應者也。彼衆聖皆窮理盡性。照曉物緣。何得忍視陷溺。莫肯援接。曾無一言示其津逕。且鈞而不綱。弋不射宿。博碩肥牯。上帝是享。以此觀之。蓋所難了。想二。三子揚權。而陳使劃然有證。祛其惑焉。

遺應詹書

晉 杜 弢

天步艱難。始自吾州。州黨流移。在於荆土。其所遇值。蔑之如遺。頓伏死亡。者略復。

過半備嘗荼毒。足下之所鑒也。客主難久。嫌隙易構。不謂樂鄉起變。出於不意。時與足下思散疑結。求擒其黨。卽惟愚算不經遠。力不陷堅耳。及在湘中。懼死求生。遂相結聚。欲守善自衛。天下小定。然後輸誠。盟府尋山。公鎮夏口。卽具陳之。此公鑒開塞之會。察窮通之運。納吾於衆疑之中。非高識。玄覩孰能若此。西州人士。得沐浴於清流。豈惟滌蕩瑕穢。乃骨肉之施。此公薨逝。斯事中廢賢。愚痛毒竊心自悼。欲遣滕永文張休豫詣大府。備列起事以來本末。但恐貪功徇名之徒。將譏間於聖主之聽。戮吾使於市朝。以彰叛逆之罪。故未敢遣之。而甘陶卒至。水陸十萬。旌旗曜於山澤。舟艦盈於三江。威則威矣。然吾衆竊未以爲懼。晉文伐原。以全信爲本。故能使諸侯歸之。陶侃宣赦書。而繼之以進討。豈所以崇奉明詔。示軌憲於四海。逼向義之夫。以爲叛逆之虜。踧思善之衆。以極不赦之責。非不戰而屈人之算也。驅略烏合。欲與必死者求一戰。未見爭衡之機權也。吾之赤心。貫於神明。西州人士。卿粗悉之耳。寧當令抱枉於時。不證於大府邪。昔虞卿不榮大國之相。與

魏○齊○同○其○安○危○。司○馬○遷○明○言○於○李○陵○。雖○刑○殘○而○無○慨○。足○下○抗○威○千○里○。聲○播○汶○衡○。進○宜○爲○國○。思○靖○難○之○略○。退○與○舊○交○。措○枉○直○之○正○。不○亦○綽○然○有○餘○。裕○乎○望○卿○。騰○吾○箋○。令○時○達○盟○府○。遣○大○使○光○臨○。使○吾○得○披○露○肝○膽○。沒○身○何○恨○哉○。伏○想○盟○府○必○結○紐○於○紀○綱○。爲○一○匡○於○聖○世○。使○吾○廁○列○義○徒○。負○戈○前○驅○。迎○皇○輿○於○閭闔○。掃○長○蛇○於○荒○裔○。雖○死○之○日○。猶○生○之○年○也○。若○然○先○清○方○夏○。卻○定○中○原○。吾○得○一○年○之○糧○。使○沂○流○西○歸○。夷○李○雄○之○逋○寇○。修○禹○貢○之○舊○獻○。展○微○勞○以○補○往○愆○。復○州○邦○以○謝○鄰○國○。亦○其○志○也○。惟○所○裁○處○耳○。吾○遠○州○寒○士○。與○足○下○出○處○殊○倫○。誠○不○足○感○神○交○而○濟○其○傾○危○。但○顯○吾○忠○誠○。則○汶○嶽○荷○忠○順○之○恕○。衡○湘○無○伐○叛○之○虞○。隆○足○下○宏○納○之○望○。拯○吾○徒○陷○溺○之○艱○。焉○可○金○玉○其○音○哉○。然○顛○顛○十○餘○萬○口○。亦○勞○瘁○於○警○備○。思○放○逸○於○南○畝○矣○。衡○嶽○江○湘○。列○吾○左○右○。若○往○言○有○貳○。血○誠○不○亮○。益○梁○受○殃○。不○惟○鄙○門○而○已○。

與苻堅書

晉 慕容泓

秦爲無道。滅我社稷。今天誘其衷。使秦師傾敗。將欲興復大燕。吳王已定關東。可

速資備。大駕奉送。家兄皇帝并宗室功臣之家。泓當率關中燕人翼衛乘輿返還。鄴都與秦以虎牢爲界。分王天下。永爲鄰好。不復爲秦之患也。鉅鹿公輕鷁銳進。爲亂兵所害。非泓之意。

與臧燾書

宋武帝

頃學尙廢弛。後進積業。衡門之內。清風輟響。良由戎車屢警。禮樂中息。浮夫近志。情與事染。豈可不敷崇墳籍。敦厲風尚。此境人士子姪。如林明發。搜訪想聞。令軌然荆玉含寶。要俟開瑩。幽蘭懷馨。事資扇發。獨習寡悟。義著周典。今經師不遠。而赴業無聞。非唯志學者鮮。或是勸誘未至邪。想復弘之。

獄中上書

宋孔熙先

囚。小人猖狂。識無遠概。徒狗意氣之小感。不料逆順之大方。與第二弟休先。首爲奸謀。干犯國憲。鑿膾脯醢。無補尤戾。陛下大明含弘。量苞天海。錄其一介之節。猥垂優逮之詔。恩非望始。沒有遺榮。終古以來。未有斯比。夫盜馬絕纓之臣。懷璧投。

書之士。其行至賤。其過至微。由識不世之恩。以盡軀命之報。卒能立功。齊魏致勳。秦楚囚雖。身陷禍逆。名節俱喪。然少也慷慨。竊慕烈士之遺風。但墮崖之木。事絕升躋。覆盤之水。理乖收汲。方當身膏鈇鉞。詒誠方來。若使魂而有靈。結草無遠。然區區丹抱。不負夙心。貪及視息。少得申暢。自惟性愛羣書。心解數術。智之所周。力之所至。莫不窮覽。究其幽微。考論既往。誠多審驗。謹畧陳所知。條牒如故。別狀願且勿遺棄。存之中書。若囚死之後。或可追存。庶九泉之下。少塞釁責。

答魏主拓跋燾書

宋臧質

省示具悉。姦懷爾自恃四脚。屢犯國疆。諸如此事。不可具說。王玄謨退於東。梁坦散於西。爾謂何以不聞童謠言邪。虜馬飲江水。佛狸死卯年。此期未至。以二軍開飲江之徑。爾冥期使然。非復人事。寡人受命相滅。期之白登。師行未遠。爾自送死。豈容復令生全。饗有桑乾。哉。但爾往攻此城。假令寡人不能殺爾。爾由我而死。爾若有幸。得爲亂兵所殺。爾若不幸。則生相鎖縛。載以一驢。直送都市。我本不圖全。

若天地無靈。力屈於爾。齋之粉之屠之裂之。如此未足謝本朝。爾識智及衆力。豈能勝苻堅邪。頃年展爾降梁者。是爾未飲江太歲。未卯故爾。斛蘭昔深入彭城。值少日雨。雉馬不返。爾豈憶邪。卽時春雨已降。四方大衆始就雲集。爾但安意攻城。莫走糧食。闕乏者告之。當出廩相貽。得所送劍刀。欲令我揮之。爾身邪。甚苦人。反各自努力。無煩多云。

與江夏王義恭牋

宋謝莊

下官凡人。非有達概異識俗外之志。實因羸疾。常恐奄忽。故少來無意於人間。豈當有心於崇達耶。頃年乘事回薄。遂果饗非次。旣足貽誦明時。又亦取愧朋友。前以聖道初開。未遑引退。及此諸夏事寧。方陳微請。款志未伸。仍荷今授。被恩之始。具披寸心。非惟在己之尤。實懼塵穢。纒序稟生多病。天下所悉。兩脅癰疾。殆與生俱。一月發動。不減兩三。每至一惡。痛來逼心。氣餘如縋。利患數年。遂成痼疾。吸吸憊憊。常如行尸。恒居死病。而不復道者。豈是疾痊。直以荷恩深重。思答殊施。牽課

冠。瘵。以。綜。所。忝。眼。患。五。月。來。便。不。復。得。夜。坐。恒。閉。帷。避。風。日。晝。夜。惛。懣。爲。此。不。復。得。朝。謁。諸。王。慶。弔。親。舊。唯。被。敕。見。不。容。停。耳。此。段。不。堪。見。賓。已。數。十。日。持。此。苦。生。而。使。銓。綜。九。流。應。對。無。方。之。訴。實。由。聖。慈。罔。已。然。當。之。信。自。苦。劇。若。才。堪。事。任。而。體。氣。休。健。承。寵。異。之。遇。處。自。效。之。塗。豈。苟。欲。思。閑。辭。事。邪。家。素。貧。弊。宅。舍。未。立。兒。息。不。免。羸。羸。而。安。之。若。命。甯。復。是。能。忘。微。祿。正。以。復。有。切。於。此。處。故。無。復。他。願。耳。今。之。所。希。唯。在。小。閑。下。官。微。命。於。天。下。至。輕。在。己。不。能。不。重。屢。經。披。請。未。蒙。哀。恕。良。由。誠。淺。辭。訥。不。足。上。感。家。世。無。年。亡。高。祖。四。十。曾。祖。三。十。二。亡。祖。四。十。七。下。官。新。歲。便。三。十。五。加。以。疾。患。如。此。當。服。幾。時。見。聖。世。就。其。中。煎。懷。若。此。實。在。可。矜。前。時。曾。啟。願。三。吳。敕。旨。云。都。不。須。復。議。外。出。莫。非。過。恩。然。亦。是。下。官。生。運。不。應。見。一。閑。逸。今。不。敢。復。言。此。當。付。之。來。生。耳。但。得。保。餘。年。無。復。物。務。少。得。養。痾。此。便。是。志。願。永。畢。在。衡。門。下。有。所。懷。動。止。必。聞。亦。無。假。居。職。患。於。不。能。裨。補。萬。一。耳。識。淺。才。常。羸。疾。如。此。孤。負。主。上。擢。受。之。恩。私。心。實。自。哀。愧。入。年。便。當。更。申。前。請。以。死。自。固。

但庸近所訴。恐未能仰徹。公恩盼弘深。粗照誠懇。願侍坐言次。賜垂拯助。則苦誠至心。庶獲哀允。若不蒙降祐。下官當於何希冀邪。仰憑愍察。願不垂恚。

登大雷岸與妹書

宋鮑照

吾自發寒雨。全行日少。加秋潦浩汗。山溪猥至。渡泝無邊。險徑遊歷。棧石星飯。結荷水宿。旅客貧辛。波路壯濶。始以今日食時。僅及大雷塗。登千里日。踰十晨。嚴霜節。悲風斷肌。去親爲客。如何如何。向因涉頓。憑觀川陸。遨神清渚。流睇方曠。東顧五洲之隔。西眺九派之分。窺地門之絕。景望天際之孤。雲長圖大念。隱心者久矣。南則積山萬狀。爭氣負高。含霞飲景。參差代雄。凌跨長隴。前後相屬。帶天有匝。橫地無窮。東則砥原遠隰。亡端靡際。寒蓬夕卷。古樹雲平。旋風四起。思鳥羣歸。靜聽無聞。極視不見。北則陂池潛演。湖脈通連。芡蒿攸積。菰蘆所繁。棲波之鳥。水化之蟲。智吞愚彊。捕小號噪。驚聒紛勃。其中西則迴江水。指長波。天合滔滔。何窮漫漫。安竭創古。迄今舳舻相接。思盡波濤。悲滿潭壑。煙歸八表。終爲野塵。而是注集。

長寫不測。修靈浩盪。知其何故哉。西南望廬山。又特驚異。基壓江湖。峯與辰漢。連接上常。積雲霞雕錦。縟若華夕。曜巖澤氣。通傳明散。綵赫似絳。天左右。青靄表裏。紫霄從嶺。而上氣盡。金光半山。以下純爲黛色。信可以神居。帝郊鎮控。湘漢者也。若溲洞所積。溪壑所射。鼓怒之所。逐擊湧濩之所。宕滌。則上窮荻浦。下至豨洲。南薄鷺爪。北極雷澗。削長埤短。可數百里。其中騰波觸天。高浪灌日。吞吐百川。寫泄萬壑。輕煙不流。華鼎振沓。弱艸朱靡。洪漣隴蹙。散渙長驚。電透箭疾。穹溘崩聚。坻飛嶺覆。回沫冠山。奔濤空谷。礪石爲之。摧碎。碕岸爲之。權落。仰視大火。俯聽波聲。愁魄脅息。心驚慄矣。至於繁化殊育。詭質怪章。則有江鵝海鴨。魚鮫水虎之類。豚首象鼻。芒鬚針尾之族。石蟹土蚌。燕箕雀蛤之儔。折甲曲牙。逆鱗反舌之屬。掩沙漲被草渚。浴雨排風。吹澇弄翻。夕景欲沈。曉霧將合。孤鶴寒嘯。遊鴻遠吟。樵蘇一歎。舟子再泣。誠足悲憂。不可說也。風吹雷飈。夜戒前路。下弦內外。望達所屆。寒暑難適。汝專自慎。夙夜戒護。勿我爲念。恐欲知之。聊書所覩。臨塗草蹙。辭意不周。

報南郡王義宣書

宋 王玄謨

頻奉二誨。伏對戰駭。先在彭泗。聞諸將皆云。必有今日之事。以鄙意量。謂無此理。去年九月。故遣參軍光僧瑗。修書表心。并密陳入相之計。欲使周旦之美。復見於今。豈意理數難推。果至於此。昔因幸會。蒙國士之顧。思報厚德。甘起泉壤。豈謂一日事與願違。公崇長姦。回自放西服。信邪細之說。忘大節之重。溺流狡之志。滅君親之恩。狎玩極寵。越希非覬。祖宗世祀。自圖顛覆。瞑目行事。未有如斯之甚者也。乃復枉覃書檄。遠示見招。此則丹心微歎。未亮於高鑑。赤城幽志。虛感於平日。環念周回。始悟知己之爲難也。公但念提職在昔。不思善教有本。徒見徐魯去就。未知仗義有人。豈不惜哉。有臣則欲其忠。誘人而導諸逆。君子忠恕。其如是乎。苟不忠恕。則擇木之翰。有所不集矣。夫挑妾者。愛其易求。妻則敬其難若。承命如響。將焉用之。原轂存輿。無禮必及。竊恐荆郢之士。已當潛貳其懷。非皇都陋臣。秉義不徙。公雖心迷迹往。猶願勉建良圖。抑撫軍忠壯慷慨。亮誠有素。新亭之勳。莫與爲

等。而妄信姦虛。坐相貶謫。不亦惑哉。幸承人乏。夙誠前驅。精甲已次近路。鎮軍駱驛。繼發太傅驃騎。嗣董元戎。乘輿親御六師。威靈遐振。人百其氣。慕義如林。舟騎雲回。赫奕千里。輒屬鞬秉銳。與執事周旋。授命當仁。理無所讓。夫君道既盡。民禮亦絕。執筆裁答。感慨交懷。

遺蕭道成書

宋 沈攸之

吾聞魚相忘於江湖。人相忘於道術。彼我可謂通之矣。大明之中。謬奉聖主。忝同侍衛。情存契濶。義著斷金。乃分帛而衣。等糧而食。值景和昏暴。心爛形焦。若斯之苦。寧可言盡。吾自分碎首於閤下。足下亦懼滅族於舍人。爾時磐石之心。既固。義無貳計。蹙迫時難。相引求全。天道矜善。此理不空。結姻之始。實關於厚。及明帝龍飛。諸人皆爲鬼矣。吾與足下。得蒙大造。親過夙眷。遇若代臣。錄其心迹。復忝驅使。臨崩之日。吾豫在遺託。加榮授寵。恩深位高。雖復情謝古人。粗識忠節。誓心仰報。期之必死。此誠志竟未申。遂先帝登遐。微願永奪。自爾已來。與足下言面殆絕。非

唯分張形迹。自然至此。脫枉一告。未嘗不對紙流涕。豈願相諂於今哉。苟有所懷。不容不白。初得賢子蹟疏云。得家信云。足下有廢立之事。安國寧民。此功巍巍。非吾等常人所信也。俄奉皇太后假令云。足下潛構深略。獨斷懷抱。一何能壯。但冠雖弊。不可承足。蓋共尊高故耳。足下交結左右。親行殺逆。以免身患。卿當謂龍逢比干。癡人耳。凡廢立大事。不可廣謀。但袁褚遺寄。劉又國之近戚。數臣地籍。實爲膏腴。人位竝居時望。若此。不與議復。誰可得共披心胸者哉。昏明改易。自古有之。豈獨大宋中屯邪。前代盛典。煥盈篇史。請爲足下言之。羣公共議。宜啟太后。奉令而行。當以王禮出第。足下乃可不通大理。要聽君子之言。豈可罔滅天理。一何若茲。孝經云。資於事父以事君。縱爲宗社大計。不爾。寧不識有君親之意邪。乃復慮以家爲陷。以爵賞。小人無狀。遂行弑害。吾雖寡識。竊從古比。豈有爲臣而有近日之事邪。使一日荼毒身首。分離生自。可恨死者何罪。且有登齋之賞。此科出於何文。凡在臣隸。誰不惋駭。華夷扣心行路。泣血乃至。不殯。使流蟲在戶。自古以來。

此例有幾。衛國微小。故有弘演不圖我宋。獨無其人。撫膺惆悵。不能自已。足下與向之殺者何異。人情易反。還成嗟悲。爲子君者。無乃難乎。蹊田之譬。豈復有異。管仲有言。君善未嘗不諫。足下諫諍不聞。甘崔杼之罪。何惡逆之甚。昔太甲還位。伊不自疑。昌邑之過。不可稱數。霍光荷託。尙共議於朝班。然後廢之。猶有湯沐之施。論者不以劫主爲名。桓溫之心。未忘於篡海西。失道人倫。頓盡廢之。以公猶禮處之。當溫彊盛。誰能相抗。尙畏懼於形迹。四海不愜。未嘗有樂推之者。伊尹霍光名高於臣節。桓氏亦得免於脇奪。凡是諸事。布於書策。若此易曉。豈待指掌。卿常言比迹夷叔。如何一旦行過。桀跖邪。聖明啟運。蒼生重造。普天率土。誰不歌抃。實是披心罄節。奉公忘私之日。而卿大收宮妓。劫奪天藏器械金寶。必充私室。移易朝舊。布置私黨。被甲入殿。內外宮閣。管籥悉關。家人吾不知。子孟孔明遺訓如此。王謝陶庾行此舉。止且朱方帝鄉。非親不授。足下非國戚也。一旦專縱自樹。云是兒守臺城。父居東府。一家兩錄。何以異此。知卿防固重複。猜畏萬端。言以禦遠。實爲

防內若德允物望夷貊猶可推心共處如其失理乖道金城湯池無所用也文長以戈戟自衛何解滅亡吳起有云義禮不修舟中之人皆讎也足下既無伍員之痛苟懷貪恠而有賊宋之心吾寧捐申包之節邪聞求忠臣者必出孝子之門卿忠孝於斯盡矣今竊天府金帛以行姦惠盜國權爵以結人情且授非其理合我則賞此事已復不可恆用用之既訖恐非忠策且受者不感識者不知不能遏姦折謀誠節慨惋隔礙數千無因自對不能知復何情顏當與足下敍平生舊款吾聞前哲絕交不出惡言但此自陳名節於胸心因告別於千載放筆增歎公私潛淚。

辭署記室又牋

宋 孔 覲

記室之局實惟華要自非文行秀敏莫或居之覲遜業之舉無聞於鄉部惰遊之貶有編於疲農直山淵藏引用不遐棄故得抃風儷潤憑附彌年今日之命非所敢冒昔之學優藝富猶尙斯難况覲能薄質魯亦何容易覲聞居方辨物君人所

以官才陳力就列。自下所以奉上。覬雖不敏。常服斯言。今竊藉惟舊。舉非尙德。恐無以提衡一隅。僉允視聽者也。伏願天明。照其心請。乞改今局。授以閒曹。則鳧鶴從方所憂去矣。

報沈攸之書

齊高帝

辱足下諂書。交道不終。爲恥已足。欲下便來。何故多罔君子。吾結髮入仕。豈期遠大。蓋感子路之言。每不擇官而宦。逮文帝之世。初被聖明。鑒賞及孝武之朝。復蒙英主顧眄。因此感激。未能自反。及與足下。斂袂定交。欸著分好。何嘗不勸慕古人。國士之心。務重前良。忠貞之節。至于契濶。杯酒殷勤。攜袖薦女成姻。志相然諾。義信之篤。誰與閒之。又乃景和陵虐。事切憂畏。明帝正位。運同休顯。敢臆論心。安危豈貳。元徽之季。聽高道慶流言。欲相討伐。發威施敕。已行內外。于時臣子。鉗口道路。以目吾。以分交。義重患難。宜均犯陵白刃。以相任保。悖主手敕。今封送相示。豈不畏威。念周旋之義耳。推此陰惠。何愧懷抱。不云足下。猥舍禍誅。前遣王思文所

牒朝事。蓋情等家國。共詳衷否。虛心小大。必以先輸。問張雍州遷代之日。將欲誰擬。本是逆論來事。非欲代張。乃封此示張。激使見怒。若張惑一言。果興怨恨。事負雅素。君子所不可爲。況張之奉國忠亮。有本情之見。與意契不貳邪。又張雍州啟事。稱彼中蠻動。兼民遭水患。敕令足下思經拯之計。吾亦有白論國如家。布情而往。每思虛達。事之相接。恆必猜離。反謂無故遣信。此乃覘察平諒之襟。動則相阻。傷負心期。自誰作故。先時足下遣信。尋盟敦舊。厲以篤終。吾止附還白。申罄情本。契然遠要。方固金石。今日舉錯定是。誰惡久言邪。元徽末德。執亡禋祀。足下備聞。無待亟述。太后惟憂。式遵前誥。興毀之略。事屬鄙躬。黜昏樹明。實惟前則。寧宗靜國。何愧前修。廢立有章。足下所允。冠弊之譏。將以何語。封爲郡王。寧爲失禮。景和無名。方之不愈乎。龍逢自匹夫之美。伊霍則社稷之臣。同異相乘。非吾所受也。登齋有賞。壽寂已蒙之于前。同謀獲功。明皇亦行之於昔。此則接踵成事。誰敢異之。謂其大收宮女。劫奪天藏。器械金寶。必充私室。必若虛設市虎。亦可不翹此言。若

以此詐民。天下豈患無眼。心苟無瑕。非所耿介。甲杖之授。事既舊典。豈見有任鎮邦家。勳經定主。而可得出入輕單。不資寵衛。斯之患慮。豈直身憂。祇奉此恩。職惟事理。朱方之牧。公卿僉意。吾亦謂微勳之次。無忝一州。且魏晉舊事。帝鄉蕃職。何嘗豫州必曹。司州必馬。折膠受柱。在體非愧。袁粲據石頭。足下無不可。吾之守東府。來告便謂非。動容見疾。頻笑入戾。乃如是乎。袁粲劉秉。受遇深重。家國既安。不思撫鎮。遂與足下表裏潛規。據城之夜。豈顧社稷。幸天未長亂。宗廟有靈。卽與褚衛軍協謀義斷。以時殄滅。想足下聞之。悵然孤沮。小兒忝侍中。代來之澤。遇直上臺。便呼一家兩錄。發不擇言。良以太甚。吾之方寸。古列共言。乃以陶庾往賢。大見譏責。足下自省。詎得以此見貽。邪比蹤夷叔。論吾則可行。過桀。躪無乃近。誣哉。謂吾不朝。此則良誨。朝之與否。想更問之。足下受先帝之恩施。擁戎西州。鼎湖之日。率土載奔。而宴安中流。酣飲自若。卽懷狼望。陵侮皇朝。晉熙殿下。以皇弟代鎮。而斷割候迎。罔蔑宗子。驅略士馬。悉以西上。郢中所遺。僅餘劣弱。昔徵茅不入。猶動

義師。況荊州。物產。雍嶧。交梁。之會。自足。下爲。牧薦。獻何。品良。馬勁。卒彼。中不。無良。皮美。鬪商。賂所。聚前後。貢奉。多少。何如。唯聞。太官。時納。飲食。耳桂。陽之。難坐。觀成。敗。自以。雍容。漢南。西伯。可擬。賴原。卽天。世非。望亦。消又。招集。逋亡。斷遏。行侶。治舟。試艦。恆以。朝廷。爲旗。的秣。馬按。劍常。願天下。有風。塵爲。人臣。者固。若是。邪至。乃不。遵制。書敕。下如。空國。恩莫。行命。令擁。隔詔。除郡。縣輒。自板。代罷。官去。職禁。還京。師。凶人。出境。無不。千里。尋躡。而反。募臺。將來。必厚。加給。賞太。妃遣。使市。馬齎。寶往。蜀。足下。悉皆。斷折。以爲。私財。此皆。遠邇。共聞。暴于。視聽。主上。叡明。當璧。寓縣。同慶。絕。域奉。贄萬。國通。書而。盤桓。百日。始有。單騎。事存。送往。于此。可徵。不朝。如此。誰應。受。誚反。以見。呵非。所反。側今。乃勒。兵以。闕象。館長。戟以。指魏。闕不。亦爲。忠臣。孝子。之。所痛心。疾首。邪賢。子元。琰獲。免虎。口及。浚。波西。邁吾。所發。遣猶。推素。懷不。畏嗾。足下。尙復。滅君。臣之。紀況。吾布。衣之交。乎遂。事不。諫既。往難。咎今。六師。西向。爲足。下憂。之。

與何點書勸令菜食

齊周顥

丈人之所以未極遐蹈。或在近全菜耶。脫灑離析之討。鼎俎網罟之興。載策其來實遠。誰敢干議。觀聖人之設膳羞。仍復爲之品節。蓋以茹毛飲血。與生民共始。縱而勿裁。將無厓畔。善爲士者。豈不以恕己爲懷。是以各靜封疆。罔相陵軼。況乃變之大者。莫過死生。生之所重。無踰性命。性命之於彼極切。滋味之在我可賒。而終身朝晡。資之以味。彼就寃殘。莫能自列。我業久長。吁哉可畏。且區區微躬。脆薄易矜。歛彼弱覺。顧步宜愍。觀其飲啄。飛行人應憐悼。況可甘心撲禡。加復恣忍。吞嚼至乃野牧盛羣。閉豢重圈。量肉揣毛。以俟支剝。如土委地。僉謂常理。百爲愴息。事豈一途。若云三世理誣。則幸矣。良快如使此道果然而受形。未息則一往一來。一生一死。輪迴是常事。雜報如家人。天如客。遇客日尠。在家日多。吾儕信業未足。長免則傷心之慘。行亦自及。丈人於血氣之類。雖無身踐。至於晨晷夜鯉。不能不取備屠門。財貝之經盜手。猶爲廉士所棄。生性之一。敢鬻刀寧復慈心。所忍騶虞。

雖飢非自死之草。不食聞其風者。豈不使人多愧。衆生之稟此形質。以畜肌骨。皆由其積壅癡迷。沈流莫反。報受穢濁。歷苦酸長。此甘與肥。皆無明之報聚也。何至復引此滋腴。自汙腸胃。丈人得此有素。聊復寸言發起耳。

答魏主托跋宏書

齊曹虎

自金精失道。皇居徒縣。喬木空存。茂草方鬱。七狄交侵。五胡代起。顧瞻中原。每用弔焉。知棄皋蘭。隨水灑澗。伊川之象。爰在茲日。古人有云。匪宅是卜。而鄰是卜。樊漢無幸。咫尺殊風。折膠入塞。乘秋犯邊。親屬窮於斬殺。士女困於虔劉。與彼蠢左。共爲唇齒。仁義弗聞。苛暴先露。乃復改易。氈裘妄自尊大。我皇開運。光宅區夏。而式亂逋逃。棄同卽異。每欲出車鞠旅。以征不庭。所冀千戚兩階。叛命咸格。遂復遊魂不戢。亂猾孔熾。孤總連率。任屬方劬。組甲十萬。雄戟千羣。以此戡難。何往不克。主上每矜率土。哀彼民黎。使不戰屈敵。兵無血刃。故部勒小戍。閉壁清野。抗威遵養。庶能懷音。若遂迷復。知進亡退。當金鉦戒路。雲旗北掃。長驅燕代。併羈名王。使

少卿忽諸頭曼不祀兵交無遠相爲憫然

遺崔祖思書

齊 劉善明

昔時之遊於今邈矣。或攜手春林。或負杖秋澗。逐清風於林杪。追素月於園垂。如何故人徂落殆盡。足下方擁旄北服。吾剖竹南甸。相去千里。間以江山。人生如寄。來會何時。嘗覽書史。數千年來。略在眼中矣。歷代參差。萬理同異。夫龍虎風雲之契。亂極必夷之幾。古今豈殊。此實一揆。日者沈攸之擁長蛇於外。粲秉復爲異識。所推唯有京鎮。創爲聖基。遂乃擢吾爲首佐。授吾以大郡。付吾關中。委吾留任。既不辨有抽劍兩城之用。橫槩拳旗之能。徒以挈瓶小智。名參佐命。常恐朝露一下。深恩不酬。憂深責重。轉不可據。還視生世。倍無次緒。藿羹布被。猶篤鄙好。惡色憎聲。暮齡猶甚。出蕃不與。台輔別入國。不與公卿游。孤立天地之間。無猜無託。唯知奉主以忠。事親以孝。臨民以潔。居家以儉。足下今鳴茄舊鄉。衣繡故國。宋季荼毒之悲。已蒙蘇秦河朔。倒懸之苦。方須救拔。遣遊辯之士。爲鄉導之使。輕裝啟行。經

營舊壤。令泗上歸業。稷下還風。君欲誰讓邪。聊送諸心。敬申貧贈。

再答釋僧巖

齊 劉善明

重獲來簡。始見玄解。皎然之悟。可謂相視而笑矣。君識鑒衆流。智該理奧。每檢感應之源。窮尋分合之說。何常不句句破的。洞盡義宗。而苟自謙光。乖其側席。仍踵覆車。無誨敗散。非知之難。行之不易也。夫去國三年。見似家人者喜。作客日久。寧不悲心。今誓捨重擔而安坐。棄羈旅如還家。對孔懷之好。敦九族之美。趙門欣欣爲樂已甚。況復文明。御運。姬召。協政。思賢。讚道。日昃忘殮。以君之才。弘君之德。帶玉聲朝。披錦振遠。功濟世猷。名揚身後。與夫髡剪之辱。鰥絕之苦。豈可同年而語哉。相與契濶久要。頗練深志。若隱展禽之賢。恐招臧氏不忠之責。故力疾題心。重敷往白。歲云暮矣。時不相待。君其勉之。勿有噬臍之悔。劉君白答。

謝竟陵王示扇啓

齊 王 融

竊以六翮風流。五明氣重。若此圓綃。有兼玩實。輕踰雪羽。絜並霜文。子淑賞其如。

規班姬儷之明月。豈直魏王九華。漢臣百綺。況復動製聖衷。垂言爛式。載摹聽眎。戒範樞機。

與豫章王賤請宥朱謙之

齊張融

禮開報仇之典。以申孝義之情。法斷相殺之條。以表權時之制。謙之揮刃酬寃。既申私禮。繫頸就死。又明公法。今仍殺之。則成當世罪人。宥而活之。即為盛朝孝子。殺一罪人。未足弘憲。活一孝子。實廣風德。張緒陸澄。是其鄉舊。應具來由。融等與謙之。並不相識。區區短見。深有恨然。

答陸澄書

齊王儉

易體微遠。實貫羣籍。施孟異聞。周韓殊旨。豈可專據小王。便為該備。依舊存鄭。高同來說。元凱注傳。超邁前儒。若不列學官。其可廢矣。賈氏注經。世所罕習。穀梁小書。無俟兩注。存麋略。范率由舊式。凡此諸義。並同雅論。疑孝經非鄭所注。僕以此書明百行之首。實人倫所先。七略藝文。並陳之六藝。不與蒼頡。凡將之流也。鄭注

虛實前代不嫌。意謂可安。仍舊立置。

答朝士訪仙佛兩法體相書

梁 陶弘景

某等白。嘗竊觀仙書。輒嗟欣忘倦。徒羨其文。莫測其理。尋七尺之體。既同稟太始。俱服五常。以何因緣。獨超青雲。而弊金石者乎。先生領袖玄門。學窮仙苑。必有以竭其川岸。請略聞雅說。隱居答曰。至哉嘉訊。豈蒙生所辯。雖然。試言之。若直推竹柏之匹。桐柳者。此本性有殊。非今日所論。若引庖刀湯稼。從養漑之功者。此又止其所從。終無永固之期。夫得仙者。並有異乎此。但斯族復有數種。今且談其正體。凡質象所結。不過形神。形神合時。則是人。是物。形神若離。則是靈。是鬼。其非離非合。佛法所攝。亦離亦合。仙道所依。今問以何能而致此。仙是鑄煉之事。極感變之理。通也。當埏埴以爲器之時。是土而異於土。雖燥未燒。遇溼猶壞。燒而未熟。不久尙毀。火力既足。表裏堅固。河山可盡。此形無滅。假令爲仙者。以藥石煉其形。以精靈瑩其神。以和氣濯其質。以善德解其纏。衆法共通。無礙無滯。欲合則乘雲駕龍。

欲離。則尸解。質不離。不合。則或存。或亡。於是各隨所業。修道進學。漸階無窮。教功令滿。亦畢竟寂滅矣。

答虞中書書

梁陶弘景

棲六。翻於荆枝。望綺雲於青漢。者有日於茲矣。而春華來被。草石開鮮。辭動情端。志交衿曲。信知鄰德之談。無虛往牘。夫子雖迹躔朱閣。而心期岱嶺。豈但散髮乎高岫。以將飛霜於絕谷。良爲欽哉。野人幸得託形崇阜。息影長林。每對月流。歎臨風軫慨。徒事累可豁。而髮容難待。自非齊生死於一致者。孰不心熱者乎。舉世悠悠。孰云同此。儻遇知己。相與共憂。竭來虞公。茲焉可邁。何爲棲棲。空勞鼓缶。迨及暇日。有事還童。不亦皎絜當年。而無忸前修也。

答諫中書書

梁陶弘景

山川之美。古來共談。高峯入雲。清流見底。兩岸石壁。五色交暉。青林翠竹。四時俱備。曉霧將歇。猿鳥亂鳴。夕日欲頽。沈鱗競躍。實是欲界之仙都。自康樂以來。未復

有能與其奇者。

答湘東王書

梁謝幾卿

下官自奉違南浦。卷迹東郊。望日臨風。瞻言佇立。仰尋惠渥。陪奉遊宴。漾桂棹於清池。席落英於曾岨。蘭香兼御。羽觴競集。側聽餘論。沐浴玄流。濤波之辯。懸河不足。譬春藻之辭。麗文無以匹。莫不相顧動容。服心勝口。不覺春日爲遙。更謂修夜爲促。嘉會難常。搏雲易遠。言念如昨。忽焉素秋。恩光不遺。善謔遠降。因事罷歸。豈云栖□。匪商官□。理就一塵。田家作苦。實符清誨。本乏金羈之飾。無假玉璧爲資。徒以老使形疏。疾令心阻。沈滯牀篔。彌歷七旬。夢幻俄頃。憂傷在念。竟知無益。思自祛遺。尋理滌意。卽以任命爲膏酥。擘鏡照形。飜以支離代萱樹。故得仰慕徽猷。永言前哲。鬼谷深栖。接輿高舉。遜名屠肆。發迹關市。其人緬邈。餘流可想。若令亡者有知。寧不縈悲玄壤。恨隔芳塵。如其逝者可作。必當昭被光景。懽同遊豫。使夫一介老圃。得筮虛心。末席去日。已疏來侍。未辱連劍。飛鳧擬非。其類懷私。茂德竊

用涕零。

與交友論隱書

梁江淹

淹者海濱窟穴。弋釣爲伍。自度非奇力異才。不足聞見於諸侯。每承梁伯鸞臥於會稽之墅。高伯達坐於華陰之山。心嘗慕之。而未能及也。嘗感子路之言。不拜官而仕。無青組紫紱龜紐虎符之志。但欲史曆巫卜爲世俗賤事耳。而影然十載。竟不免衣食之敗。何則。性有所短。不可韋絃者有五。一則體本疲緩。臥不肯起。二則人問應修。酷癩作書。三則賓客相對。口不能言。四則性甚畏動。事絕不行。五則愚婞妄發。輒被口語。有五短。而無一長。豈可處人間耶。知短而不可易者。所謂輪椎分定也。猶如雞鷺之有毛。不能得鸞鳳之光采矣。况今年已三十。白髮雜生。長夜輾轉。亂憂非一。以溘至之命。如星殞天。保光半路。不攀長意。徒自欺取。筋驚髓冷。殊多災恙。心頑質堅。偏好冥默。旣信神農服食之言。久固天竺道士之說。守清淨。煉神丹。心甚愛之。行善業。度一世。意甚美之。今但願拾薇藿。誦詩書。樂天理性。歛

骨折步不踐。過失之地耳。猶以妻孥未奪。桃李須陰。望在五畝之宅。半頃之田。鳥赴簷。上水匝階。下則請從此隱。長謝故人。若乃登峨眉。度流沙。餐金石。讀仙經。嘗聞其驗。非今日之所言也。誰謂難知。青鳥明之。貴布筆墨。然亦焉足道哉。

報袁叔明書

梁江淹

僕知之矣。高舉爲別。執手未期。浮雲色曉。悵然魂飛。前辱贈書。知命僕息。心越地采。藥稽山。友人幸甚。去歲迫名茂才。冬盡不獲有報。引領於邑。情詎可及。足下推僕者。不一二談也。僕聞狂士之行有三。竊嘗志之。其奇者則以紫天爲宇。環海爲池。裸身大笑。被髮行歌。其次則堅坐崩岸。僵臥深窟。朝滄松屑。夜誦仙經。其下則辭榮城市。退耕巖谷。塞逕絕賓。杜門不出。然此皆羞爲西山之餓夫。東國之黜臣。而況其鄉黨乎。或有社稷之士。入而忘歸。則爭論南宮之前。衛主於邪。伏身北闕之下。納君於治。至乃一說之奇。驚畏左右。一劍之功。震慄鄰國。夫能者唯橫議。漢庭怒髮。燕路且猶不數。而況於鄰里乎。若僕之行止。已無可言矣。材不肖文質無。

所直。徒以結髮遊學。備聞士大夫言曰。在國忠。處家孝。取與廉。交友義。故拂衣於梁齊之館。抗手於楚趙之門。且十年矣。容貌不能動人。智謀不足自遠。竟慙君子之恩。卒離饑寒之禍。近親不言。左右莫教。涼秋陰陰。獨立閑館。輕塵入戶。飛鳥無迹。命保琴書。而守妻子。其可得哉。故國史小官也。而子長爲之執戟下位也。而子雲居之。僕非有輕車驃騎之略。交河雲險之功。幸以盜竊文史之末。因循卜祝之間。故俛首求衣。斂眉寄食。耳若十口之隸。去於饑寒。從疾舊里。斥歸故鄉。箕坐高視。舉酒極望。雖五侯交書。羣公走幣。僕亦在南山之南矣。此可爲智者道。難與俗士言也。方今仲秋。風飛平原。影色水鳥。立於孤洲。蒼葭變於河曲。寂然淵視。憂心辭矣。獨念賢明蚤世。英華殂落。僕亦何人以堪久長。一旦松柏被地。墳壟刺天。何時復能銜杯酒者乎。忽忽若狂。願足下自愛也。

到主簿日牋詣右軍建平王

梁江淹

淹乃庸人。素非奇士。旣慙鄒魯儒生之德。又謝燕趙俠客之節。徒以結髮衛次。暫

聞仁義。常欲永辭冠劍。弋釣畝壑。而身輕恩重。猥奉末光。枉白璧之惠。降黑貂之私。因茲感激。未能自反。負金羈於淮吳。從後車於河楚。竟不能曜丹臙。騰英聲。絕白雲。負蒼梧。至可知矣。不謂咸池再暉。瑤光重照。開高天之慈。布厚地之施。承命以驚。巡走且失。淹聞古人爲報。常有意焉。至迺一說之效。齊王動色。一劍之感。趙王解衣。孤心迴鑿。有殞自天。

與徐勉書

梁沈約

吾弱年孤苦。傍無葦屬。往者將墜於地。契闊屯邅。困於朝夕。崎嶇薄宦。事非爲己。望得小祿。傍此東歸。歲逾十稔。方忝襄陽縣公私情計。非所了具。以身資物。不得不任人事。永明末出守東陽。意在止足。而建武肇運。人世膠加。一去不反。行之未易。及昏猜之始。王政多門。因此謀退。庶幾可果。託卿布懷於徐令。想記未忘。聖道聿興。謬逢嘉運。往志宿心。復成乖爽。今歲開元禮年。云至懸車之請。事由恩奪。誠不能弘宣風政。光闡朝猷。尙欲討尋文簿。時議同異。而開年以來。病增慮切。當由

生靈有限。勞役過差。總此凋竭。歸之暮年。牽策行止。努力祇事。外觀傍覽。尙似全人。而形骸力用。不相綜攝。常須過自束持。方可僊俛。解衣一臥。支體不復。相關上熱。下冷。月增日篤。取煖則煩。加寒必利。後差不及。前差後劇。必甚前劇。百日數旬。革帶常應。移孔以手握。臂率計月小半分。以此推算。豈能支久。若此不休。日復一日。將貽聖主不追之恨。冒欲表聞。乞歸老之秩。若天假其年。還得平健。才力所堪。惟思是策。

答沈麟士書

梁沈約

獨往之業。雖聞前載。高塵逸軌。罕或共時。未嘗不附裘興懷。望古遐矚。尊資拔俗。遙然沈冥。自遠幽貞之操。義高篆策。雖蔣詡不窺城市。鄭眞名動京師。何遠之有。名山旣鄉。內所豐清。川又坐臥。可對不出戶庭。而與禽尙齊。美哉約少。不自涯早。愛蟲鳥。逐食推遷。未諧夙願。冀幽期可託。克全素履。與尊賢弋釣。泉皋以慰。閑暮則生平之心。於此遂矣。

與陶弘景書

梁沈約

先生。糠粃俗流。超然獨遠。烈電羽帶。總轡雲霞。方當名書絳簡。身遊玄闕。憑星夕臥。望日朝滄。而至理深微。曖焉難睹。惟欲下風問道。未知厥路。若夫栖遲閑遠。咀嚙瓊芝。出入清都。師友靈聖。循崖反跡。無缺惟心。

弔樂永世書

梁任昉

永世孝友之至。發自天真。皎潔之操。曾非矯飾。意有所固。白刃不移。理有所託。淄澠自辨。餘息惟存。視陰無幾。終始之託。方寄祁侯。豈謂樂生。反先朝露。以理遺滯。鄙識未曉。以事尋悲。哀楚交至。宿草易滋。傷恨不滅。松檟可拱。悲緒無窮。

上蕭太傅固辭奪禮啟

梁任昉

昉啟。近啟歸訴。庶諒窮歎。奉被還旨。未垂哀察。悼心失圖。泣血待旦。君於品庶。示均鎔造。干祿祈榮。更爲自拔。虧教廢禮。豈關視聽。所不忍言。具陳茲啟。昉往從末宦。祿不代耕。饑寒無甘旨之資。限役廢晨昏之半。膝下之歡。已同過隙。几筵之慕。

幾何可憑。且奠醑不親。如在安寄。晨暮寂寥。閱若無主。所守既無。別理窮咽。豈及多喻。明公功格區宇。感通有塗。若霈然降靈。賜寢嚴命。是知孝治所被。爰至無心。錫類所及。匪徒教義。不任崩迫之情。謹奉啟事。陳聞謹啟。

與朱元思書

梁 吳 均

風煙俱淨。天山共色。從流飄蕩。任意東西。自富陽至桐廬一百許里。奇山異水。天下獨絕。水皆漂碧。千丈見底。游魚細石。直視無礙。急湍甚箭。猛浪若奔。夾峯高山。皆生寒樹。負勢競上。互相軒邈。爭高直指。千百成峯。泉水激石。泠泠作響。好鳥相鳴。嚶嚶成韻。蟬則千轉不窮。猿則百叫無絕。鳶飛戾天者。望峰息心。經綸世務者。窺谷忘反。橫河上蔽。在晝猶昏。疎條交映。有時見日。

與顧章書

梁 吳 均

僕去月謝病還。覓薛蘿梅溪之西。有石門山者。森壁爭霞。孤峰限日。幽岫含雲。深溪蓄翠。蟬吟鶴唳。水響猿啼。英英相雜。綿綿成韻。既素重幽居。遂葺宇其上。幸富

菊花偏饒竹實山谷所資於斯已辦仁智所樂豈徒語哉

報伏挺書

梁徐勉

復覽來書。累牘兼翰。事苞出處。言兼語默。辭義周悉。意致深遠。發函伸紙。倍增憤歎。卿雄州擢秀。弱冠升朝。穿綜百家。佃漁六學。觀眸表其韶慧。視色見其英朗。若魯國之名駒。邁雲中之白鶴。及占顯邑。試吏腴壤。將有武城絃歌。桐鄉謠詠。豈與卓魯斷斷同年而語邪。方當見賞良能。有加寵授。飾茲簪帶。寘彼周行。而欲遠慕卷舒。用懷愚智。既知益之爲累。爰悟滿則辭多。高蹈風塵。良所欽挹。况以金商戒節。素秋御序。蕭條林野。無人相樂。偃臥墳籍。遊浪儒玄。物我兼忘。寵辱誰滯。誠乃歡羨。用有殊同。今逃聽傍求。興懷寤宿。白駒空谷。幽人引領。貧賤爲恥。鳥獸難羣。故當捐此薜蘿。出從鷁鷺。無乖隱顯。不亦休哉。吾智乏佐時才。慙濟世稟。承朝則不敢荒寧。力弱途遙。愧心非一。天下有道。堯人何事。得因疲病。念從閑逸。若使車書混合。尉候無警。作樂制禮。紀石封山。然後乃返。服衡門實爲多幸。但夙有風歎。

遺茲虛眩。瘠類士安。羸同長孺。簿領沈廢。臺閣未理。娛耳爛腸。因事而息。非關欲
追松子。遠慕留侯。若乃天假之年。自當靖恭所職。擬非倫匹。良覺辭費。覽復循環。
爽焉如失。清塵獨遠。白雲飄蕩。依然何極。猥降書札。示之文翰。覽復成誦。流連縹
紙。昔仲宣才敏。藉中郎而表譽。正平穎悟。賴北海以騰聲。望古料今。吾有慙德。儻
成卷帙。力爲稱首。無令獨耀隨掌。空使辭人扼腕。式閭願見。宜事掃門。亦有來思。
赴其懸榻。輕苔魚網。別當以薦。城闕之歎。曷日無懷。所遲萱蘇。書不盡意。

爲衡山侯與婦書

梁何遜

昔人遨遊洛汭。會遇陽臺。神女髣髴。有如今別。雖帳前微笑。涉想猶存。而幄裏餘
香。從風且歇。掩屏爲疾。引領成勞。鏡想分鸞。琴悲別鶴。心如膏火。獨夜自煎。思等
流波。終朝不息。始知萋萋萱草。忘憂之言不實。團團輕扇。合歡之用爲虛。路邇人
遐。音塵寂絕。一日三秋。不足爲喻。弗陳往翰。寧寫歎懷。遲枉瓊瑤。慰其杼柚。

謝賚錢治宅啓

梁任孝恭

繩樞斷續。薄雨已傾。席戶穿闌。微風自捲。不悟恩隆。問舍降自天造。事深更宅。乃被庸微。跪條可授。毀垣再築。遂得窗臨上路。戶望東家。人悅爽塏。里驚輪奐。門學于公。逆容駟馬。巷均王濬。豫擬幡旗。

奉辭南康王府牋

梁 王僧孺

下官不能避溺山隅。而正冠李下。既貽疵辱。方致徽繩。解錄收簪。且歸初服。竊以董生偉器。止相驕王。賈子上才。爰傳卑土。下官生年有值。謬仰清塵。假翼西雍。竊步東閣。多慙絃服。取亂長裾。高楊相望。直居坐右。長階如畫。獨在僚端。借其從容之詞。假以寬和之色。恩禮遠過。申白榮望。多厠應徐。厚德難逢。小人易說。方謂離腸隕首。不足以報一言。露膽披誠。何能以酬屢顧。寧謂罽羅。裁舉微禽。先落闔闔。始吹細草。仍墜一辭。九畹方去。五雲縱天。網是漏聖。恩可恃。亦復孰寄心骸。何施眉目。方當橫潭。亂海就魚。鼈而爲羣。披榛捫樹。從虺蛇而相伍。豈復仰聽金聲。式瞻玉色。顧步高軒。悲如霰委。踟躕下席。淚若綆繫。

答江琰書

梁 王僧孺

猥惠嘉音。用蠲疾首。發函伸紙。朗若披雲。等嶰谷之清音。比洞庭之高曲。辭則美矣。而擬其非倫。譬享海鳥。以醇醪。嘉膳棲林。狝以崇楹。曾拱苟非。其實立有驚怖。况復以一離訴棄。賓實淮然。豈復能使一筭可輕。八厨斯引。且登清漢。乍棄黃汗。望影析支。爭塗再楫。其或蹲林。臥石藉卉。荆不過田。峻野老漁。父樵客酌。醴焚枯鳴。鳴相勞羹。藜含糗。果然滿腹。寧有幡旗。貴客車馬。大賓獻書。盡先賢之德。作頌罄前皇之美。豈不俯拾青紫。坐享大夫。况復咏高梧而賦脩竹。背清淮而遊長苑。留東閣以從容。登石室而高視。豈與夫身沒名隕。同年而共毀譽哉。

答湘東王書

梁 劉孝綽

伏承自辭皇邑。爰至荆臺。未勞刺舉。且擣高麗。近雖預觀尺錦。而不覩全玉。昔臨淄詞賦。悉與楊脩。未殫寶笥。顧慙先哲。渚宮舊俗。朝衣多故。李固之薦二邦。徐珍之奏七邑。威懷之道。兼而有之。當欲使金石流功。恥用翰墨垂迹。雖乖知二。偶達

聖心爰自退居。素里卻掃窮閭。比楊倫之不出。譬張擊之杜門。昔趙卿窮愁肆言。得失漢臣鬱志。廣敍盛衰。彼此一時。擬非其匹。竊以文豹何辜。以文爲罪。由此而談。又何容易。故韜翰吮墨。多歷寒暑。旣闕子幼。南山之歌。又微敬通。渭水之賦。無以自同。獻笑少酬。褻誘且才。乖體物不擬。作於立根。事殊宿諾。寧貽懼於朱亥。顧己反躬。載懷累息。但瞻言漢廣。邈若天涯。區區一心。分宵九逝。殿下降情白屋。存問相尋。食棋懷。音矧伊人矣。

北使還與永豐侯書

梁 劉孝儀

足踐寒地。身犯朔風。暮宿客亭。晨炊謁舍。飄飄辛苦。迄屆氈鄉。雜種覃化。頗慕中國。兵傳李緒之法。樓擬衛律所治。而毳幙難淹。酪漿易饜。王程有限。時反玉關。射鹿胡奴。乃共歸國。刻龍漢節。還持入塞。馬銜苜蓿。嘶立故墟。人獲蒲萄。歸種舊里。稚子出迎。善鄰相勞。倦握蟹螯。亟覆蝦碗。未改朱顏。略多自醉。用此終日。亦以自娛。

謝晉安王賜宜城酒啓

梁 劉孝儀

孝儀啟。奉教垂賜宜城酒四器。歲暮不聊。在陰卽慘。於斯二理。總萃一時。少府鬪。猴莫能致笑。大夫落雉不足解顏。忽值瓶瀉椒芳。壺開玉液。漢樽莫過。殷杯未逢。方平醉而遁仙。羲和眈而廢職。仰憑殊塗。便申私飲。未矚壘恥。已觀幘岸。傾耳求音。不聞霆擊。澄神密眊。豈覲山高。愈疾消憂。于斯已驗。遺榮忽賤。卽事不欺。酩酊之中。猶知銘荷。

與陳伯之書

梁 丘遲

遲頓首。陳將軍足下無恙。幸甚幸甚。將軍勇冠三軍。才爲世出。棄燕雀之小志。慕鴻鵠以高翔。昔因機變化。遭遇明主。立功立事。開國稱孤。朱輪華轂。擁旄萬里。何其壯也。如何一旦爲奔亡之虜。聞鳴鏑而股戰。對穹廬以屈膝。又何劣邪。尋君去就之際。非有他故。直以不能內審諸己。外受流言。沈迷猖獗。以至於此。聖朝赦罪責功。棄瑕錄用。推赤心於天下。安反側於萬物。將軍之所知不假。僕一二談也。朱

鮪涉血於友于。張繡刺刃於愛子。漢主不以爲疑。魏君待之若舊。況將軍無昔人之罪。而勳重於當世。夫迷塗知反。往哲是與。不遠而復。先典攸高。主上屈法申恩。吞舟是漏。將軍松柏不翦。親戚安居。高臺未傾。愛妾尙在。悠悠爾心。亦何可言。今功臣名將。雁行有序。佩紫懷黃。讚帷幄之謀。乘軺建節。奉疆場之任。並刑馬作誓。傳之子孫。將軍獨覩。顏借命驅馳。氈裘之長。寧不哀哉。夫以慕容超之強。身送東市。姚泓之盛。面縛西都。故知霜露所均。不育異類。姬漢舊邦。無取雜種。北虜僭盜中原。多歷年所。惡積禍盈。理至焦爛。況僞嬖昏狡。自相夷戮。部落攜離。酋豪猜貳。方當繫頸蠻邸。懸首藁街。而將軍魚游於沸鼎之中。燕巢於飛幕之上。不亦惑乎。暮春三月。江南草長。雜花生樹。羣鷺亂飛。見故國之旗鼓。感平生於疇日。撫絃登陣。豈不愴愴。所以廉公之思趙將。吳子之泣西河人之情也。將軍獨無情哉。想早勵良規。自求多福。當今皇帝盛明。天下安樂。白環西獻。楛矢東來。夜郎滇池。解辮請職。朝鮮昌海。蹶角受化。惟北狄野心。崛強沙塞之間。欲延歲月之命耳。中軍臨

川殿下明德茂親。總茲戎重。弔民洛汭。伐罪秦中。若遂不改。方思僕言。聊布往懷。君其詳之。丘遲頓首。

追答劉秣陵詔書

梁劉峻

劉侯既重有斯難。值余有天倫之感。竟未之致也。尋而此君長逝。化爲異物。緒言餘論。蘊而莫傳。或有自其家。得而示余者。余悲其音徽未沫。而其人已亡。青簡尙新。而宿草將列。泫然不知涕之無從也。雖隙駟不留。尺波電謝。而秋菊春蘭。英華靡絕。故存其梗槩。更酬其旨。若使墨翟之言無爽。宣室之談有徵。冀東平之樹望。咸陽而西。靡蓋山之泉。聞絃歌而赴節。但懸劍空壠。有恨如何。

謝歷日啓

梁庾肩吾

凌渠所奏。弦望既符。鄧平之言。鏘銖皆合。登臺視朔。覩雲物之必書。拂管移灰。識權衡之有度。初開卷始。暫謂春留。未覽篇終。便傷冬及。徘徊厚渥。比日爲年。

與尙書令王儉書

梁張充

吳國男子張充。致書於琅琊王君侯侍者。頃日路長。愁霖韜晦。涼暑未平。想無虧攝。充幸以漁釣之閒。鏃採之暇。時復以卷軸自娛。逍遙前史。從橫萬古。動默之路。多端紛綸百年。昇降之徒不一。故以圓行方止。用之異也。金剛水。柔性之別也。善御性者。不違金水之質。善爲器者。不易方圓之用。所以北海掛簪帶之高。河南降璽言之貴。充生平少偶。不以利欲干懷。三十六年。差得以棲貧自澹。介然之志。峭聳霜崖。確乎之情。峰橫海岸。影纓天閣。旣謝廊廟之華。綴組雲臺。終慙衣冠之秀。所以擯跡江皋。徜徉隴畔者。實由氣岸疎凝。情塗捐隔。獨師懷抱。不見許於俗人。孤秀神崖。每還回於在世。故君山直上。蹙壓於當年。叔陽夔舉。韞轆乎千載。充所以長羣魚鳥。畢影松阿。半頃之田。足以輸稅五畝之宅。樹以桑麻。嘯歌於川澤之間。諷詠於澗池之上。汎濫於漁父之游。偃息於卜居之下。如此而已。充何識焉。若夫驚巖罩日。壯海逢天。竦石崩尋。分危落仞。桂蘭綺靡。叢雜於山幽。松柏森陰。相繚於澗曲。元卿於是乎不歸。伯休亦以茲長往。若迺飛竿釣渚。濯足滄洲。獨浪煙。

霞高臥。風月悠悠。琴酒岫遠。誰來灼灼。文談空罷。方寸不覺鬱然。千里路阻。江川每至。西風何嘗不眷。聊因疾隙。略舉諸襟。持此片言。輕枉高聽。丈人歲路未彊。學優而仕。道佐蒼生。功橫海望。入朝則協長倩之誠。出議則抗仲子之節。可謂盛德維時。孤松獨秀者也。素履未詳。斯旅尙眇。茂陵之彥。望冠蓋而長懷。霸山之氓。佇衣車而聳歎。得無惜乎。若鴻裝撰御。鶴駕軒空。則岸不辭枯。山被其潤。奇禽異羽。或巖際而逢迎。弱霧輕煙。乍林端而菴藹。東都不足奇。南山豈爲貴。充崑西之百姓。岱表之一民。蠶而衣。耕且食。不能事王侯。覓知己。造時人。騁游說。蓬轉於屠博之間。其歡甚矣。丈人早遇承華。中逢崇禮。肆上之眷。望溢於早辰。鄉下之言。謬延於造次。然舉世皆謂充爲狂充。亦何能與諸君道之哉。是以披聞見。掃心胸。述平生。論語默。所以通夢交魂。推衿送抱者。其惟丈人而已。關山夔阻。書罷莫因。儻遇樵者。妄塵執事。

東宮上掘得慈覺寺鐘啓

梁簡文帝

竊以白亭舊室。絕顯禎祥之氣。闕里故堂。暫聞鐘石之響。猶復存諸良史。汗彼篆素。豈如杏梁遺飾。迴成紺殿椒墀。昔處仍構寶階。啟鑿鐘於殊里。記靈文於福地。雖魏廟出璽魯祠。現碧固以推茲。孝感憇此禎契。將郭舍鄙其開金羊田。陋其產玉。豈直季武庭樹。愧韓起之譽蜀相宅。基慙孝安之碣。伏惟覽啟增思。撫瑞深悲。慟切示齋。哀喻封篋。

與廣信侯書

梁簡文帝

綱白闊絕音旨。每用延結。風嚴寒勁。願比怡和。伏承淨名法席。親承金口。辭珍鹿苑。理愜鷲山。微密祕藏。於斯既隆。莊嚴道場。自茲彌闡。豈止心燈夜炳。亦乃意蕊晨飛。況兄慧思弘明。本長內教。今陪十善之車。開八正之路。流般若之水。洗意識之塵。以此春翹。方爲秋實。王每憶華林勝集。亦叨末位。終朝竟夜。沐浴妙言。至於席罷。日餘退休。傍省攜手。登臨兼展。談笑仰望。九層俯窺。百尺金池。動月玉樹。含風當於此時。足稱法樂。今卷帷之部。乘傳一隅。聞慧雨滂流。喜躍充徧。徒挹懸河。

無伸承。稟空無。所有不瑩情。靈緣癡。有愛自嗟難。拔兼下車已來。義言蓋少。舊憶已盡。新解未餐。既慙口誦。復非心辨。永謝瀉瓶。終慙染氎。是則慈雲既擁。智海亦深。影末波餘。希時灑拂。但睽違轉積。興言盈臉。願加敬納。言不宣意。謹白。

答新渝侯和詩書

梁簡文帝

垂示三首。風雲吐於行間。珠玉生於字裏。跨躡曹左。含超潘陸。雙鬢向光。風流已絕。九梁插花。步搖爲古。高樓懷怨。結眉表色。長門下泣。破粉成痕。復有影裏細腰。令與真類。鏡中好面。還將畫等。此皆性情卓絕。新致英奇。故知吹簫入秦。方識來鳳之巧。鳴瑟向趙。始覩駐雲之曲。手持口誦。喜荷交并也。

答蕭子雲上飛白書屏風書

梁簡文帝

得所送飛白書。縑屏風十牒。冠六書而獨美。超二篆而擅奇。乍寫星區。時圖鳥翅。非觀觸石。已覺雲飛。豈待金璫。便覩蟬翼。問諸衣帛。前哲未巧。懸彼帳中。昔賢掩色。

答張纘謝示集書

梁簡文帝

綱少好文章。於今二十五載矣。竊嘗論之。日月參辰。火龍黼黻。尙且著於玄象。章乎人事。而況文辭可止。詠歌可輟乎。不爲壯夫揚雄。實小言破道。非謂君子曹植。亦小辯破言論之科。刑罪在不赦。至如春庭落景。轉蕙承風。秋雨且晴。櫓梧初下。浮雲生野。明月入樓。時命親賓。乍動嚴駕。車渠屢酌。鸚鵡驟傾。伊昔三邊久留。四戰胡霧連天。征旗拂日。時聞塢笛。遙聽塞笳。或鄉思悽然。或雄心憤薄。是以沈吟短翰。補綴庸音。寓目寫心。因事而作。

答徐摛書

梁簡文帝

山濤有言。東宮養德而已。但今與古殊。時有監撫之務。竟不能黜邪進善。少助國章。獻可替不。仰裨聖政。以此慙惶。無忘夕惕。驅馳五嶺。在戎十年。險阻艱難。備更之矣。觀夫全軀具臣。刀筆小吏。未嘗識山川之形勢。介冑之勤勞。細民之疾苦。風俗之嗜好。高閣之間。可來高門之地。徒重玉饌。羅前黃金。在握泥訾。粟斯容與。自

熹亦復言軒義以來一人而已使人見此良足長歎

與劉孝綽書

梁簡文帝

執別灑澹。嗣音阻闊。合璧不停。旋灰屢徙。玉霜夜下。旅雁晨飛。想涼燠得宜。時候無爽。既官寺務煩。簿領殷湊。等張釋之條理。同于公之明察。雕龍之才。本傳靈虵之譽。自高。頗得暇逸。於篇章。從容於文諷。頃擁旄西邁。載離寒暑。曉河未落。拂桂棹而先征。夕鳥歸林。懸孤帆而未息。足使邊心憤薄。鄉思邈迴。但離闊已久。載勞寤寐。佇聞還驛。以慰相思。

謝賚扇啓

梁簡文帝

臣綱啟。傳詔饒僧明奉宣敕旨。垂賚細綾大文畫柳蟬山扇一柄。文筠析縷。香發海檀。肅肅清風。卽令象簟非貴。依依散采。便覺夏室含霜。飲露青蜩。應三伏之修景。羣飛黃雀。送六月之南風。蔽日垂陰。薰澤慙采。浮涼滌暑。蘋末愧吹。聖人造物之巧。俯萃庸薄。王府好玩之恩。於茲下被。頂戴曲私。伏增欣躍。謹奉啟事。謝聞。謹

啟。

與蕭挹書

梁元帝

關別清顏。忽焉已久。未復音息。勞望情深。暑氣方隆。恒保清善。握蘭雲閣。解紱龍樓。允膺妙選。良爲幸甚。想同僚多士。方駕連曹。雅步南宮。容與自玩。士衡已後。惟在茲日。惟昆與季。文藻相暉。二陸三張。豈獨擅美。比暇日無事。時復含毫。頗有賦詩。別當相簡。但衡巫峻極。漢水悠長。何時把袂。共披心腹。

與劉智藏書

梁元帝

菩薩蕭法車。置郵大士。劉智藏侍者。自林宗遄返。玄度言歸。以結元禮之心。彌益眞長之歎。故以臨風望美。對月懷賢。有勞寤寐。無忘興寢。方今玄冥在節。歲聿云邁。日似青緹。雲浮紅藥。清臺炭重。北宮井溢。想禪說爲娛。稍符九次。成誦之功。轉探三密。山間芳杜。自有松竹之娛。巖穴鳴琴。非無薜蘿之致。修德之暇。差足樂也。昔韓梅兩福。求羊二仲。鄭林騰名於馮翊。周黨傳芳於太原。或有百鎰可捐。千金

非。貴。松。子。爲。餐。蒲。根。是。服。未。有。高。蹈。眞。儒。歸。宗。法。海。梵。王。四。鶴。集。林。鸞。而。相。鳴。帝
釋。千。馬。經。丘。園。而。跼。步。有。一。於。此。猶。或。稱。奇。兼。而。總。之。何。其。盛。也。故。知。南。臨。之。水
已。類。呂。梁。之。川。北。眺。之。山。彌。同。武。安。之。嶺。豈。復。還。思。溱。浦。尙。想。彊。臺。睠。彼。漢。池。載
懷。荒。谷。以。此。相。求。心。可。知。矣。僕。久。厭。塵。邦。本。懷。人。外。加。以。服。膺。常。住。諷。味。了。因。彌
用。思。齊。每。增。求。友。常。欲。登。卻。月。之。嶺。蔭。偃。蓋。之。松。挹。璇。玉。之。源。解。蓮。華。之。劍。藩。維
有。限。脫。屣。無。由。每。坐。向。詡。之。牀。恒。思。管。寧。之。榻。夢。匡。山。而。太。息。想。桓。亭。而。延。佇。白
雲。間。之。蒼。江。不。極。未。因。抵。掌。我。勞。如。何。想。無。金。玉。數。在。郵。示。弱。水。難。航。猶。致。書。於
青。鳥。流。川。弗。遠。佇。芳。音。於。赤。玉。鶴。望。還。信。以。代。葢。蘇。得。志。忘。言。此。寧。多。述。法。車。叩
頭。叩。頭。

與劉孝綽書

梁 元 帝

君屏居多暇。差得肆意典墳。吟咏情性。比復稀數古人。不以委約。而能不技癢。且
虞卿史遷。由斯而作。想摛屬之興。益當不少。洛地紙貴。京師名動。彼此一時。何其

盛也。近在道務閑。微得點翰。雖無紀行之作。頗有懷舊之篇。至此已來。衆諸屑役。小生之詆。恐取辱於廬江。遮道之姦。慮興謀於從事。方且褰帷自厲。求瘼不休。筆墨之功。曾何暇豫。至於心乎愛矣。未嘗有歇思樂惠音清風。靡聞譬夫夢想溫玉。飢渴明珠。雖愧卞隨。猶爲好事。新有所製。想能示之。勿等清慮。徒虛其請。無由賞悉。遣此代懷。數路計行。遲還芳札。

謝東宮賚園啟

梁張纘

性愛山泉。頗樂閑曠。雖復伏膺堯門。情存魏闕。至於一丘一壑。自謂出處無辨。常願卜居幽僻。屏避喧塵。傍山臨流。面郊負郭。依林結宇。憩桃李之夏陰。對徑開軒。采橘柚之秋實。而王畿陸海。畝號一金。涇渭土膏。豪傑所競。徒居好時。必待使越之裝。別館河陽。亦賚牧荆之富。此園左帶平湖。修陂千頃。右臨長薄。清潭百仞。前逼逸陌。朝夕爽塏。後望鍾阜。表裏煙霞。每膺春迎。夏華卉競。發背秋向。冬雲物澄。霽歸瞰戶。牖不異登臨。升降堦墀。已窮歷覽。舟楫所屆。累日不能究其源。魚鳥之

豐山澤不能喻其美。

謝皇太子賚果然褥啟

梁張纘

伏以狐裘熊席。徒負舊名。玄豹青羶。未能適體。嚴冰在節。朔纒結宇。吹綸愧暖。挾纘慚溫。但勤非伏。寢恩重夜。覆道媿經。明坐叨重席。仰榮俯媿。進退在顏。

答貞陽侯書

梁裴之橫

之橫白足下。定國等至。枉雅誨。具高氏致送之旨。卽彼行人。遠到京城。大慰應有成命。但江山夔阻。未奉朝廷報辭。第下國之麟趾。先朝所寄。籍彼鄰好。義深主祀。自宜軍車入境。端委還朝。而朱旆啟行。戎旌望國。江東士子。未達高懷。僕早預簪裾。夙叨眷與。弦矢旣暌。江淮成阻。青黎裁封。雖繼西鳥之辭。白雲在天。豈無北風之歎。但變故紛紛。忠貞宜顯。寒松負雪。誠愧節者之徒。勁草疾風。寧忘烈士之概。齊師若反。旆淮路退。舍肥水。彼之敬送。止縉紳之徒。此之奉迎。則軒蓋而已。伏聽朝旨。遲申展敬之橫白。

答王褒書

陳周弘讓

甚矣悲哉。此之爲別也。雲飛泥沈。金鑠蘭滅。玉音不嗣。瑤華莫因。家兄至自鎬。致書於穹谷。故人之跡。有如對面。開題申紙。流臉沾膝。江南燠熱。橘柚冬青。渭北。寒楊榆晚。葉土風氣候。各集所安。餐衛適時。寢興多福。甚善甚善。與弟分袂。西陲。言反東區。難保周陵。還依蔣徑。三姜離析。二仲不歸。麋鹿爲曹。更多悲緒。丹經在握。貧病莫諧。芝朮可求。恆爲採掇。昔吾壯日。及弟富年。俱值邕熙。並歡衡泌。南風雅操。清商妙曲。絃琴促坐。無乏名晨。玉瀝金華。冀獲難老。不虞一旦。翻覆波瀾。吾已愒陰。弟非茂齒。禽尙之契。各在天涯。永念生平。難爲胸臆。且次房遊魂不反。遠產骸柩。無託。但願愛玉骸。珍金箱。保期頤。享黃髮。猶冀蒼鷹。賴鯉。時傳尺素。清風朗月。俱寄相思。子淵子淵。長爲別矣。握管操觚。聲淚俱咽。

使東魏值侯景亂與北齊尙書令求還書

陳徐陵

夫一言所感。凝暉照於魯陽。一志冥通。飛泉涌於疏勒。况復元首康哉。股肱良哉。

鄰國相聞風教相期者也。天道窮剝。鍾亂本朝。情計馳惶。公私顛懼。而骸骨之請。徒淹歲寒。顛沛之祈。空盈卷軸。是所不圖也。非所仰望也。執事不聞之乎。昔分鼇命鷹之世。觀河拜洛之年。則有日烏流災。風禽騁暴。天傾西北。地缺東南。盛旱坼山川。長波含五嶽。我大梁應金圖而有亢。纂玉鏡而猶屯。何則。聖人不能爲時。斯固窮通之恆理也。至如荊州刺史湘東王。幾神之本。元寄名言。陶鑄之餘。猶爲堯舜。雖復六代之舞。陳於總章。九州之歌。登於司樂。虞夔拊石。晉曠調鐘。未足頌此英聲。無以宣其盛德者也。若使郊禋楚翼。寧非祀夏之君。勘定艱難。便是匡周之霸。豈徒幽王徙雍。期月爲都。姚帝遷河。周年成邑。方今越裳藐藐。馴雉北飛。肅慎茫茫。風牛南偃。吾君之子。含識知歸。而答旨云。何所投身。斯其未喻一也。又晉熙等郡。皆入貴朝。去我潯陽。經塗何幾。至於鐺鐺曉漏。的的宵烽。隔溲浦。而相聞。臨高臺。而可望。泉流寶蓋。遙憶溢城。峰號香鑪。依然廬嶽。日者鄱陽嗣王。治兵匯派。屯戍淪波。朝夕賤書。春秋方物。吾無從以躡屩。彼有路而齊鑣。豈其然乎。斯不然。

矣。又近者邵陵王通和此國。郢中上客。雲聚魏都。鄴下名卿。風馳江浦。豈盧龍之徑。於彼新開銅駝之街。於我長閉。何彼途甚。易非勞於五丁。我路爲難。如登於九折。地不私載。何其爽歟。而答旨云。還路無從。斯所未喻。二也。晉熙廬江。義陽安陸。皆云歎附。非復危邦。計彼中途。便當靜晏。自斯以北。桴鼓不鳴。自此以南。封疆未壹。如其境外。脫殞輕軀。幸非邊吏之羞。何在匹夫之命。又此賓遊。通無貨殖。忝非韓起。聘鄭私買。玉環吳札。過徐躬要。寶劍由來。宴錫凡厥。囊裝行役。淹留皆已。虛罄散有限之微財。供無期之久客。斯何知矣。且據圖刎首。愚者不爲。運斧全身。庸流所鑒。何則。生輕一髮。自重千鈞。不以賈盜明矣。骨肉不任。充鼎俎。皮毛不足入貨。財盜有道。焉吾無憂矣。又公家遣使。脫有資須。本朝非隆平之時。遊客豈皇華之勢。輕裝獨宿。非勞聚櫟之儀。微騎間行。寧望輜軒之禮。歸人將從。私具驢騾。緣道亭郵。唯希蔬粟。若曰留之。無煩於執事。遣之。有費於官司。或以顛沛爲言。或云資裝可懼。固非通論。皆是外篇。斯所未喻。三也。又若以吾徒應還侯景。侯景凶逆。

殲我國家。天下含靈。人懷憤厲。既不獲投身社稷。衛難乘輿。四冢磔蚩尤。千刃刺王莽。安所謂俛首頓膝。歸奉寇讎。佩弭腰鞬。爲其皂隸。日者通和。方敦曩睦。凶人狙詐。遂駭狼心。頗疑宋萬之誅。彌懼荀營之請。所以奔蹄勁角。專恣憑陵。凡我行人。徧膺讎憾。政復殪筋醢骨。抽舌探肝。於彼凶情。猶當未雪。海內之所知也。君侯之所具焉。又聞本朝王公都人士女。風行雨散。東播西流。京邑丘墟。蕞蓬蕭瑟。偃師還望。咸爲草萊。灞陵回首。俱沾霜露。此又君之所知也。彼以何義。爭免寇讎。我以何親。爭歸委質。昔鉅平貴將。懸重於陸公。叔向名流。深知於饒蔑。吾雖不敏。常慕前脩。不圖明庶有懷。翻其以此量物。昔魏氏將亡。羣凶挺爭。諸賢戮力。想得其朋。爲葛榮之黨邪。爲邢果之徒邪。如曰不然。斯所未喻。四也。假使吾徒還爲凶黨。侯景生於趙代。家自幽恆。居則台司。行爲連率。山川形勢。軍國彛章。不勞請箸。爲籌。便當屈指能算。景以逋逃小醜。羊豕同羣。身寓江臯。家留河朔。春春井井。如鬼如神。其不然乎。抑又君之所知也。且夫宮闈秘事。竝若雲霄。英俊訐謨。寧非帷幄。

或陽驚以定策。或焚藁而奏書。朝廷之士猶難參預。羈旅之人何階耳目。至於禮樂沿革。刑政寬猛。則謳歌已遠。萬舞成風。不知手之舞之。足之蹈之也。安在搖其牙齒。爲間諜者哉。若謂復命西朝。終奔東虜。雖齊梁有隔。尉候奚殊。豈以河曲之難浮。而曰江關之可濟。河橋馬度。寧非宋典之姦。關路雞鳴。皆曰田文之客。何其通蔽。乃爾相妨。斯所未喻。五也。又兵交使在。雖著前經。儻同狗僕之尤。追肆寒山之怒。則凡諸元帥。竝釋縲囚。爰及偏裨。同無翦馘。乃至鍾儀。見赦。朋笑遵途。襄老蒙歸。虞歌引路。吾等張旛。拭玉脩好。尋盟涉泗。之與浮河。郊勞至於贈賄。公恩旣被。賓敬無違。今者何愆。翻蒙貶責。若以此爲言。斯所未喻。六也。若曰妖氛永久。喪亂悠然。哀我奔波。存其形魄。固已銘茲厚德。戴此洪恩。譬渤澥而俱深。方嵩華而猶重。但山梁飲啄。非有意於籠樊。江海飛浮。本無情於鐘鼓。況吾等營魂已謝。餘息空留。悲默爲生。何能支久。是則雖蒙養護。更天天年。若以此爲言。斯所未喻。七也。若云逆豎殲夷。當聽反命。高軒繼路。飛蓋相隨。未解其言。何能善謔。夫屯亨治。

亂。豈有意於前期。謝常侍今年五十有一。吾今年四十有四。介已知命。儻又杖鄉。計彼後生。肩隨而已。豈銀臺之要。彼未從師。金竈之方。吾知其訣。政恐南陽菊水。竟不延齡。東海桑田。無由佇望。若以此爲言。斯所未喻。八也。足下清襟。睥說書園。文林。凡自洪荒。終乎幽厲。如吾今日。寧有其人。爰至春秋。微宜商略。夫姬宗殄墜。霸道昏凶。或執政之多門。或陪臣之涼德。故臧孫有禮。翻囚與國之賓。鄭伯無德。空怒天王之使。遷箕卿於兩館。繫樂子於三年。斯匪貪亂之風邪。寧當今之高例也。至於雙嶠。且帝四海爭雄。或構趙而侵燕。或連韓而謀魏。身求盟於楚殿。躬奪璧於秦庭。輸寶鼎以託齊王。馳安車而誘梁客。其外膏脣。販舌分路。揚鑣無罪。無辜如兄如弟。逮乎中陽受命。天下同規。巡省諸華。無聞幽辱。及三方之霸也。孫甘言以媵媚。曹屈詐以羈縻。旂軫歲到於句吳。冠蓋年馳於庸蜀。則客嘲殊險。賓戲已深。共盡遊談。誰云猜忤。若使搜求故實。脫有前蹤。恐是叔世之姦謀。而非邦之勝略也。抑又聞之。雲師火帝。澆淳乃異其風。龍躍麟驚。王霸雖殊其道。莫不崇

君親以詔物敦敬養以治民預有邦家曾無隆替吾奉違溫清仍屬亂離寇虜猖狂公私播越蕭軒靡御王舫誰持瞻望鄉關何心天地自非生憑廩竹源出空桑行路含情猶其相愍常謂擇官而仕非曰孝家擇事而趨非云忠國況乎欽承有道驂駕前王郎吏明經鷓鴣知禮巡方省化咸問高年東序西膠皆尊者臺吾以圭璋玉帛通聘來朝屬世道之屯期鍾生民之否運兼年累載無申元直之祈銜泣吞聲長對公閭之怒情禮之訴將同逆鱗忠孝之言皆應辭舌是所不圖也非所仰望也且天倫之愛何得忘懷妻子之情誰能無累夫以清河公主之貴餘姚書佐之家莫限高卑皆被驅略自東南醜虜抄販饑民臺署郎官俱餒牆壁況吾生離死別多歷暄寒孀室嬰兒何可言念如得身還鄉土躬自推求猶冀提攜俱免凶虐夫四聰不達華陽君所謂亂臣百姓無冤孫叔敖稱爲良相足下高才重譽參贊經綸非豹非貔聞詩聞禮而中朝大議曾未經論清禁嘉謀安能相及謬謂非周舍容容類胡廣何其無諍臣哉歲月如流人生何幾晨看旅雁心赴江淮

昏望牽牛情馳揚越朝千悲而掩泣夜萬緒而迴腸不自知其爲生不自知其爲死也足下素挺詞鋒兼長理窟匡丞相解頤之說樂令君清耳之談向所諮疑誰能曉喻若鄙言爲謬來旨必通分請灰釘甘從斧鑊何但規規默默齧舌低頭而已哉若一理存焉猶希矜眷何必期令我等必死齊都足趙魏之黃塵加幽并之片骨遂使東平拱樹長懷向漢之悲西洛孤墳恆表思鄉之夢千祈以屢哽慟增深徐陵叩頭再拜

答周處士弘讓書

陳徐陵

辱去年三月二十七日告仰披華翰甚慰翹結承歸來天目得肆閒居差有弄玉之俱仙非無孟光之同隱優游俯仰極素女之經文升降盈虛盡軒皇之圖藝雖復考盤在阿不爲獨宿詎勞金液唯飲玉泉比夫煮石紛紜終年不爛燒丹辛苦至老方成及其得道冥真何勞逸之相懸也又承有方生亦在天目理當仰稟明師總斯祕要豈如張陵弟子自墜高巖孫秦門人競投滄海何其樂乎聖朝虛心

版築尙想丘園。若彼能赴嘉招。便當謹申高命。但其人往歲亦望至京師。觀此風神。確乎難拔。故以忘懷爵祿。詎持犧牲之談。高視公卿。獨騁蜡螿之訓。所恐有道三辟。公車十徵。若斯者終當不屈。此既然矣。請復詳言。昔楚國兩龔同時。紆組漢陰。二老相攜。抱甕兄之幽貞。若其鑿坏負石。方同形影。結綬彈冠。無容越楚。況乎糞土夔龍。羶臊名器。已行所不欲。非應及人。忽承來音。良以多感。何則。潁陽巢父。不曾令薦。許由商洛。園公未聞求徵。綺季斯所未喻。高懷而躊躇於矛楯也。唯遲山阿近信。更惠芳音。如或誠言。謹便聞奏。第夙勞比劇。不復多呈。

與王吳郡僧智書

陳徐陵

孤子徐陵頓首。昔林宗道主。時人多慕德之賓。無忌雄豪。天下盡希風之客。况復王家沈默。謝氏混立。名貴公門。譽華卿子。而秦峯阻篋。浙水悠長。諮訴無因。但用窮結。比青華已戒。白露方溥。體中何如。願康勝鄧仲華服袞之年。苟令則擁麾之日。徒云早達。未可同功。今日相方。豈不高視。竊承富春頃歲。多難薦臻。邑閭皆

空黔黎將盡。御史舊楊。零落不存。太傅齊室。荒茫無處。自神廳所屆。繼負斯歸。新屋方華。故田斯墾。府吏閑坐。長使誦經。督郵無事。唯慮吹笛。東苞海水。俱承幕府之威。西泊江沱。同仰惟良之化。政差邊張。何其神也。孤子無心。覲冒苟郟。光陰風疾。彌留示有餘息。恩將公聘。窮擯虜庭。博望侯極迹於黃河。移中監流滯於滄海。自斯以後。唯有庸賤。本應埋魂。趙魏折骨。幽并豈意。餘年復反。鄉國仰屬。伊公在亳。涓老師周旌。賁江園采拾。衡巷遂以哀駘。不棄甕盎。無遺還顧。庸虛未應。偕比竊承。君侯過被。以光輝。屢有吹噓之言。頻蒙薦延之澤。故得周行紫閣。升降丹墀。點汚清朝。豈不荒愧。雖復華陰砥柱。帶地窮深。嵩高維岳。極天爲重。未可以方斯盛典。譬此洪恩。年迫桑榆。豈期酬報。政以川波非遠。對奉無因。夜夢子長之遊。朝覽希道之疏。浮雲西北。徒懷魏帝之文。行雨東南。思假飛山之便。窮誠已結。荒係逾深。方事祈寒。願加珍納。謹扶力白書。迷乏不次。孤子徐陵頓首。

與李那書

陳徐陵

籍甚清微。常懷虛眷。山川緬邈。河渭象于經星。顧望風流。長安遠於朝日。青要戒節。白露爲霜。君子爲宜。福履多愈。雍容廊廟。獻納便蕃。留使催書。駐馬成檄。車騎將軍。賓客盈座。丞相長史。瞻對有勞。脫惠箋繪。慰其翹想。吾栖遲茂陵之下。臥病漳水之濱。迫以嶮巇。難爲砭藥。平生壯意。竊愛篇章。忽覲高文。載懷勞竚。此後殷儀同至止。王人授館。用阻班荆。常在公筵。敬析名作。獲殷公所借陪駕。終南入重陽閣詩。及荊州大乘寺宜陽石像碑四首。鏗鏘并奏。能驚趙鞅之魂。輝煥相華。時瞬安豐之眼。山澤晻靄。松竹參差。若見三峻之峯。依然四皓之廟。甘泉鹵簿。盡在清文。扶風輦路。悉陳華簡。昔魏武虛帳。韓王故臺。自古文人。皆爲詞賦。未有登茲舊閣。歎茲幽宮。標句清新。發言哀斷。豈止悲聞帝瑟。泣望羊碑。一詠歌梁之言。便掩盈懷之淚。至如披文相質。意致縱橫。才壯風雲。義深淵海。方今二乘斯悟。同免化城。六道知歸。皆踰火宅。宜陽之作。特會幽衿。所覩黃絹之詞。彌懷白雲之頌。但耆闍遠嶽。檀特高峯。開士羅浮。康公懸溜。不獲銘茲雅頌。耀彼幽巖。省覽循環。用

忘。饑。渴。握。之。不。置。恆。如。趙。璧。翫。之。不。足。同。於。玉。枕。京。師。長。者。好。事。才。人。爭。造。蓬。門。
請。觀。高。製。軒。車。滿。路。如。看。太。學。之。碑。街。巷。相。填。無。異。華。陰。之。市。但。豐。城。兩。劍。尙。不。
俱。來。韓。子。雙。環。必。希。皆。見。莫。以。好。龍。無。別。木。雁。可。嗤。載。望。瓊。瑤。因。乏。行。李。金。風。已。
勁。玉。質。宜。調。書。不。盡。言。但。聞。爻。繫。徐。陵。頓。首。

答族人梁東海太守長孺書

陳 徐 陵

恩。報。近。歲。奉。使。來。歸。辱。彼。河。清。年。中。告。行。并。惠。以。明。鏡。亟。離。寒。暑。雖。復。時。陳。梁。鶴。
日。照。孫。鸞。言。慰。相。思。反。增。離。眷。劉。傳。三。常。侍。還。又。承。書。札。銀。鈎。甚。麗。玉。疏。依。然。開。
封。伸。紙。破。愁。爲。笑。素。秋。方。屆。溽。暑。稍。闌。體。中。何。如。善。保。元。吉。藪。臺。之。璧。少。海。之。珠。
何。必。鄉。里。所。在。爲。貴。卿。託。身。大。國。既。已。積。年。彼。朝。英。彥。理。相。欽。挹。方。當。交。辟。三。命。
清。宦。兩。宮。何。乃。闊。然。遲。有。問。也。吾。七。十。之。歲。崦。嵫。已。迫。朽。老。之。疾。隨。年。而。甚。徒。懷。
北。邨。之。切。未。遂。東。都。之。期。牽。役。承。閒。但。有。衰。頓。賢。從。君。政。佐。佑。興。基。中。舍。謀。殿。中。
並。休。宜。自。別。有。書。問。來。告。訪。吾。文。章。吾。自。歸。來。鄉。國。亟。徙。炎。涼。牽。課。疲。朽。不。無。辭。

製而應物隨時。未曾編錄。既承今告。輒復搜檢。行人相繼。別簡知音。但既乏新聲。全同古樂。正恐多慚於協律。致睡于文侯耳。燕南趙北。地角天涯。言接末由。但以潛歎。善敬德中郎。並北境之良選。皇華之上求。若可輶軒。別當委白君問。

爲王寬與婦義安主書

陳伏知道

昔魚嶺逢車。芝田息駕。雖見妖姪。終成揮忽。遂使家勝陽臺。爲歡非夢。人慙蕭史。相偶成仙。輕扇初開。欣看笑靨。長眉始畫。愁對離妝。猶聞徒佩。顧長廊之未盡。尙分行憶。冀迥陌之難迴。廣攝金屏。莫令愁擁。恆開錦幔。速望人歸。鏡臺新去。應餘落粉。熏爐未徙。定有餘烟。淚滴芳衾。錦花長濕。愁隨玉軫。琴鶴恆驚。已覺錦水。丹鱗。素書稀遠。玉山青鳥。仙使難通。綵筆試操。香牋遂滿。行雲可託。夢想還勞。九重千日。詎想倡家。單枕一宵。便如蕩子。當令照影。雙來一鸞。羞鏡勿使。窺窗。獨坐。嫦娥笑人。

答劉景安書

北魏崔亮

汝所言乃有深致。吾乘時邀幸。得爲吏部尙書。當其壯也。尙不如人。況今朽老。而居帝難之任。常思同升舉直。以報明主之恩。盡忠竭力。不爲貽厥之累。昨爲此格。有由而然。今已爲汝所怪。千載之後。誰知我哉。可靜念吾言。當爲汝論之。吾廉正。六爲吏部郎。三爲尙書。銓衡所宜。頗知之矣。但古今不同。時宜須異。何者。昔有中。正。品。其。才。第。上。之。尙。書。尙。書。據。狀。量。人。授。職。此。乃。與。天。下。羣。賢。共。爵。人。也。吾。謂。當。爾。之。時。無。遺。才。無。濫。舉。矣。而。汝。猶。云。十。收。六。七。況。今。日。之。選。專。歸。尙。書。以。一。人。之。鑑。照。察。天。下。劉。毅。所。云。一。吏。部。兩。郎。中。而。欲。究。鏡。人。物。何。異。以。管。闕。天。而。求。其。博。哉。今。勳。人。甚。多。又。羽。林。入。選。武。夫。崛起。不。解。書。計。唯。可。曠。弩。前。驅。指。蹤。捕。噬。而。已。忽。令。垂。組。乘。軒。求。其。烹。鮮。之。效。未。曾。操。刀。而。使。專。割。又。武。人。至。多。官。員。至。少。不。可。周。溥。設。今。十。人。共。一。官。猶。無。官。可。授。況。一。人。望。一。官。何。由。可。不。怨。哉。吾。近。面。執。不。宜。使。武。人。入。選。請。賜。其。爵。厚。其。祿。既。不。見。從。是。以。權。立。此。格。限。以。停。年。耳。昔。子。產。鑄。刑。書。以。救。弊。叔。向。譏。之。以。正。法。何。異。汝。以。古。禮。難。權。宜。哉。仲。尼。云。德。我。者。亦。春。

秋罪我者亦春秋吾之此指其由是也。但令當來君子知吾意焉。

與梁太尉王僧辯書

北齊 文宣帝

梁國不造。禍難相仍。侯景傾蕩。建業武陵。彎弓巴漢。卿志格玄穹。精貫白日。戮力齊心。芟夷逆醜。凡在有情。莫不嗟尙。況我鄰國。緝事言前。而西寇乘間。復相掩襲。梁主不能固守江陵。殞身宗祏。王師未及。便已降敗。士民小大。皆畢寇虜。乃睠南顧。憤歎盈懷。卿臣子之情。念當顛裂。如聞權立支子。號令江陰。年甫十餘。極爲冲貌。梁豐未已。負荷諒難。祭則衛君。政由甯氏。幹弱枝彊。終古所忌。朕以天下爲家。大道濟物。以梁國淪滅。有懷舊好。存亡拯墜。義在今辰。扶危嗣事。非長伊德。彼貞陽侯。梁武猶子。長沙之胤。以年以望。堪保金陵。故置爲梁主。納於彼國。便詔上黨王渙。總攝羣將。扶送江表。雷動風馳。助掃寃逆。清河王岳。前救荆城。軍度安陸。既不相及。憤惋良深。恐及西寇乘流。復躡江左。今轉次漢口。與陸居士相會。卿宜協我良規。厲彼羣帥。部分舟艦。迎接今王。鳩勒勁勇。并心一力。西羌烏合。本非勅寇。

直是湘東怯弱。致此淪胥。今者之師。何往不尅。善建良圖。副朕所望也。

與徐僕射書

北齊 尹義尚

義尚白。漳濱江涘。眇若天涯。去雁歸鴻。雲飛難寄。瞻言鄉國。泣珠淚而盈懷。寤寐德音。仰烟霞而疾首。既而暑往寒來。愁雲滿塞。河冰自結。非由漢后之軍。草露恆嚴。寧假公超之術。霜飄虎渠。距知朔野之寒。雪覆龍岑。徒憶清江之煖。眷言疇昔。邈矣遐哉。係仰清顏。願常豐勝。雍容廊廟。時宣匡奉之風。偃息康莊。無廢怡神之道。義尚望國窮魂。繁憂積歲。雖其未殞。豈曰生年。日者謬忝後車。陪遊上國。曾觀禮樂。見季子之知音。經奉侍言。嗟鄭僑之博物。如軍書愈疾之製。碑文妙絕之詞。猶貴紙於鄴中。尚傳聲於許下。逮乎百六之年。仍離再三之酷。吉凶禮數。綿歷歲時。嘗膽茹辛。備同艱險。每冀穹蒼有感。大國矜憫。以禮言歸。馭驛俱反。何期毳毛湮淪。墜灑漳濱之水。逸翮摩霄。輕託蓬萊之頂。信知有幸無幸。見生死之殊。倫才與不才。驗沉浮之異趣。昔秦歸趙璧。還得連城。晉失楚材。直亡其寶。自國祚中絕。

行李不通。等避世於桃源。同留寓於仙嶺。每瞻牛候馬。想金陵之聖人。今覩皇華。知有熊之建國。賓堯仕舜。猶是八才。緯武經文。方儔四貴。幸甚幸甚。昔楊朱岐路。悲始末之長離。蘇李河梁。歎平生之永別。雖復音塵可嗣。終隔風雲。夢想時通。無因覲止。依依望楚。寸陰有待。百年將半。輕生若是。命也如何。今車書同軌。行李相繼。猥荷文移。通賜論及。輶軒旣以復命。義尙未被哀矜。竊以晉楚釋囚。共成親好。今乃拘彼來此。不亦難乎。夫以匹夫投分。猶須坦蕩。況兩國二君。那宜細計。彼若才如廉樂。猶恐不習禁兵。苟非其人。留之何益。然三戰三敗。卒成強霸之功。七縱七擒。終仗天威之力。由此言之。彼此如耳。徐元直西蜀之謀。士關雲長劉氏之驍將。須歸卽遣。知叛弗追。今之與古。何其異趣。且二國叶和。長江共有。如首如尾。可以同規。或貳或猜。豈名唇齒。是以隔河分畝。君子知其不終。衷甲尋盟。春秋貶其行。詐伏承聖上欽明。英賢佐輔。方知解網之氣。用表無偏之化。若彼之俘虜。猶且蒙歸。此之南冠。何辭不遣。如其苟相猜貳。信不由衷。雖篤親鄰。義尙何罪。不任辛

酸之念。經陳萬一之情。伏願仁人少存疇昔承閑之便。希復開言。昔張子餘年。誠稱吳王之賜。微躬邁影。實仰含宏之澤。載筆漣洏。罔知所運。

與陽休之書

北齊

祖鴻勳

陽生大弟。吾比以家貧親老。時還故郡。在本縣之西界。有雕山焉。其處閒遠。水石清麗。高巖四匝。良田數頃。家先有野舍於斯。而遭亂荒廢。今復經始。卽石成基。憑林起棟。蘿生映宇。泉流繞階。月松風草。緣庭綺合。日華雲實。傍沼星羅。簷下流煙。共霄氣而舒卷。園中桃李。雜椿柏而葱蒨。時一褰裳涉澗。負杖登峯。心悠悠以孤。上身飄飄而將逝。杳然不復自知在天地間矣。若此者久之。乃還所住。孤坐危石。撫琴對水。獨詠山阿。舉酒望月。聽風聲以興思。聞鶴唳以動懷。企莊生之逍遙。慕尙子之清曠。首戴萌蒲。身衣縑襪。出藝梁稻。歸奉慈親。緩步當車。無事爲貴。斯已適矣。豈必撫塵哉。而吾生旣繫名聲之韁。鑠就良工之削。刷振佩紫臺之上。鼓袖丹墀之下。采金匱之漏簡。訪玉山之遺文。敞精神於丘墳。盡心力於河漢。擣藻期。

之。顰。繡。發。議。必。在。芬。香。茲。自。美。耳。吾。無。取。焉。嘗。試。論。之。夫。崑。峯。積。玉。光。澤。者。前。毀。瑤。山。叢。桂。芳。茂。者。先。折。是。以。東。都。有。掛。冕。之。臣。南。國。見。捐。情。之。士。斯。豈。惡。梁。錦。好。蔬。布。哉。蓋。欲。保。其。七。尺。終。其。百。年。耳。今。弟。官。位。既。達。聲。華。已。遠。象。由。齒。斃。膏。用。明。煎。既。覽。老。氏。谷。神。之。談。應。體。留。侯。止。足。之。逸。若。能。翻。然。清。尚。解。佩。捐。簪。則。吾。於。茲。山。莊。可。辦。一。得。把。臂。入。林。掛。巾。垂。枝。攜。酒。登。巘。舒。席。平。山。道。素。志。論。舊。款。訪。丹。法。語。立。書。斯。亦。樂。矣。何。必。富。貴。乎。去。矣。陽。子。途。乖。趣。別。緬。尋。此。旨。杳。若。天。漢。已。矣。哉。書。不。盡。意。

酬濟北戴先生遠書

北周 釋慧命

幽。林。沙。門。釋。慧。命。酬。書。濟。北。戴。先。生。夫。一。眞。常。湛。微。妙。於。是。同。立。萬。聖。乘。機。違。順。以。之。殊。迹。是。以。西。關。明。道。東。野。談。仁。雕。朴。改。工。有。無。異。軫。今。若。括。此。二。門。原。茲。兩。教。豈。不。歸。宗。三。轉。會。入。五。乘。藉。淺。之。深。資。權。顯。實。斯。若。池。分。四。水。始。則。殊。名。海。控。八。河。終。無。別。味。檀。越。幼。挺。奇。才。夙。懷。茂。緒。華。辭。卓。世。雅。致。參。立。智。涉。五。明。學。兼。三。

教益矣。能志蹈顏生之逸軌。損之爲道。摹李氏之玄蹤。雖復六經該廣。百家繁富。聖賢異派。儒墨分流。或事曠而文殷。或言高而旨遠。莫不納如瓶。受說似河。傾明鏡。匪疲洪鐘。任扣子建。搥以奇文。長卿惡其高趣。故雖秦楚分墟。周梁改俗。白眉青蓋。龜玉之價。勿踰栖鳳。臥龍魚水之交。莫異。加以識鑿苦空。志排塵俗。形雖廊廟。器乃江湖。是以屬歎牽絲。興言世網。辭同應陸。調合張嚴。嗟朱火之遽傳。愍清波之速逝。方應濯足從道。洗耳辭榮。九轉充虛。四禪排疾。然後尋入正以味一真。解十纏而遣三患。斯之德也。寧不至哉。貧道識鏡難清。心塵易壅。定慙華水。戒非草繫。才侔撤燭。學謝傳燈。內有愧於德充。外無狎於人世。是以淹滯一丘。寓形蓬柳。端居千仞。託志筠松。測四序於風霜。候三旬於朏魄。至乃夜聞山鳥。仍代九成。晝視遊魚。聊追二子。華戶敞衿。在原非病。朱門結駟。於我如雲。所歎藤鼠。易侵樹猿。難靜勞想。驚頭倦思。雞足至於林凋。秋葉曾無獨覺之明。谷響春鶯。終切寡聞之歎。忽來承問。曲見光譽。幽氣若蘭。清音如玉。誠復溢目致歡。而實撫膺多愧。雖

識謝天池未辨北溟之說而事同泥井慙聞東海之談所冀伊人於焉加我黃石
匪遙結期明旦白駒可繫用永終朝善敬清猷時因素札言不洗意報此何伸

爲梁上黃侯世子與婦書

北周 庾 信

昔仙人導引尙刻三秋神女將梳猶期九日未有龍飛劍匣鶴別琴臺莫不銜怨
而心悲聞猿而下淚人非新市何處尋家別異邯鄲那應知路想鏡中看影當不
含啼欄外將花居然俱笑分杯帳裏却扇牀前故是不思何時能憶當學海神逐
潮風而來往勿如織女待填河而相見

答趙王啟

北周 庾 信

某啟仰承張幕全韓連營上地澠池置陣解鄧禹之圍函谷開關削王元之印鋒
旗朝上刁斗夜鳴彌雄壯士之心足起橫行之志況復才人出娉還得賢夫塞外
有夫人之城軍中有女子之氣都尉青旗卽時春色將軍大樹已復花開雲氣浮
壘流星泛枕細舞長歌橫簫直笛當乎此時青雲之上信不學無術本分泥沈忽

逢天造。搜揚側陋。今者遂總憲司。預聞刊鼎。獻歲刑書。既應懸法。上春木鐸。方須
徇人。但年髮已秋。性靈久竭。嘉石肺石。無以測量。舌端筆端。惟知繁擁。乖展一月。
遂涉兩年。傾首東瞻。山河千里。風塵未盡。霜露沾衣。仰願珍宜。以爲身寶。謹啟。

謝趙王示新詩啟

北周 庾信

某啟。鄭叡至。奉手教。累紙并示新詩。八體六文。足驚毫翰。四始六義。實動性靈。落
落詞高。飄飄意遠。文異水而湧。泉筆非秋而垂。露藏之山崑。可使雲霧鬱起。濟之
江浦。必當蛟龍繞船。首夏清和。聖躬怡裕。琉璃彤管。鵲顧鸞迴。婉轉綠沈。猿驚雁
落。下風傾首。以日爲年。健爲舍人。實有誠願。碧雞主簿。無由遂心。寂寞荆扉。疏蕪
蘭徑。驂駕來梁。未期卜日。遣騎到鄴。希垂枉道。

謝趙王賚米啟

北周 庾信

某啟。奉教垂賚米十石。丹烏銜穗。既集西周。黃雀隨車。還飛東市。漬而爲種。不無
霜雪之精。取以論兵。卽有山川之勢。某陋巷簞瓢。櫛風沐雨。剝榆皮於秋寒。掘蟄

舊。於。寒。山。仰。費。國。租。遂。開。塵。甑。非。丹。竈。而。流。珠。異。荆。臺。而。炊。玉。東。方。朔。之。捧。米。既。息。長。飢。西。門。豹。之。墾。田。方。慙。此。賚。

六朝尺廣

九〇

六朝尺牘終

上海文明書局發行

白話尺牘

平民尺牘新範

一冊
三角

白話女界尺牘

二冊
三角半

白話女子尺牘

一冊
三角

商界白話尺牘

二冊
四角

學生適用
白話書信範本

一冊
四角

名人白話尺牘

二冊
七角半

各省中華書局經售

上海文書局發行

三十大家尺牘

各省中華書局經售

欲求文章優美當讀古文欲求尺牘超羣亦當讀古人之尺牘讀古人之尺牘不獨知其尺牘之體例兼可通文章之家法本局有見及此特選唐宋明清近代人之著名者共三十家分編三輯分列於後

唐宋十大家尺牘

- | | | |
|--------|-----|------|
| 韓昌黎尺牘 | 十二册 | 一元二角 |
| 柳柳州尺牘 | 一册 | |
| 歐陽修尺牘 | 一册 | |
| 蘇老泉尺牘 | 一册 | |
| 司馬溫公尺牘 | 二册 | |
| 馬臨川尺牘 | 一册 | |
| 王臨川尺牘 | 一册 | |
| 曾南豐尺牘 | 一册 | |
| 蘇東坡尺牘 | 二册 | |
| 黃山谷尺牘 | 二册 | |
| 呂東萊尺牘 | 二册 | |

明清十大家尺牘

- | | | |
|-------|-----|------|
| 王陽明尺牘 | 十二册 | 一元三角 |
| 顧亭林尺牘 | 二册 | |
| 侯朝宗尺牘 | 一册 | |
| 姚惜抱尺牘 | 一册 | |
| 吳穀人尺牘 | 一册 | |
| 錢牧齋尺牘 | 二册 | |
| 尤西堂尺牘 | 一册 | |
| 方望溪尺牘 | 一册 | |
| 歸震川尺牘 | 二册 | |
| 王弼園尺牘 | 二册 | |

近代十大家尺牘

- | | | |
|-------|----|------|
| 曾滌生尺牘 | 十册 | 一元三角 |
| 俞曲園尺牘 | 一册 | |
| 吳摯甫尺牘 | 二册 | |
| 王益吾尺牘 | 一册 | |
| 王壬秋尺牘 | 一册 | |
| 樊樊山尺牘 | 一册 | |
| 康南海尺牘 | 一册 | |
| 林畏廬尺牘 | 一册 | |
| 章太炎尺牘 | 一册 | |
| 梁任公尺牘 | 一册 | |

~~148019~~

上海图书馆藏书



A541 212 0010 7482B

中華民國十六年九月出版
中華民國十六年九月發行

歷代名尺
家尺版六朝尺牘 (全一册)

每部定價洋三角五分



此書有著作權 必究

分售處

中華書局

編輯者 吳興王文濡

發行者 文明書局

印刷者 文明書局

發行所 上海文華書局

發行所 上海文華書局

北京	天津	張家口	保定	石家莊	濟南	太原	開封	西安	成都
重慶	長沙	常德	衡州	漢口	武昌	沙市	南昌	九江	安慶
燕湖	南京	杭州	福州	青島	廈門	廣州	汕頭	潮州	雲南
吉林	煙台	鄭州	青島	東昌	徐州	蘭州	貴陽	長春	新加坡



6

833

~~548219~~